

萬 有 文 庫

第 二 集 七 百 種

王 雲 五 主 編

曝 書 亭 集

(三 十)

朱 彝 尊 撰

商 務 印 書 館 發 行

曝書亭集

(三十)

朱彝尊撰

國學基本叢書

曝書亭集卷第七十四

墓誌銘一

王處士墓誌銘

彝陵之州有處士王君。客代州。年月日以疾卒。其友人管代州參將事榆林趙君。斂而葬之。州城之南。演武場之右。山西布政司參議清苑陳君。首爲詩悼之。富平李子爲立傳。而遺書乞予文誌其墓。嗚呼。君之制行。可謂信乎朋友矣。君名席民。字安生。少補彝陵州學生。遭亂。匿山中。胡公際亨保湖南。聞其才。令掌書記。城陷。胡公不屈死。處士與諸客皆就縛。將刑。諸客仰天哀號。涕泗被面。處士慷慨就死。監者壯之。爲言於主帥。悉減死。分籍卒伍。處士乃得隸趙君籍中。日負芻以供軍饜。處士芻獨少。同伍皆詬詈處士。愬之趙君。趙君與言。大驚。遽前擁處士上坐。解衣衣之。遂爲趙君賓客。會趙君移官代州。引處士自助。邊城閒暇。處士乃復事文史。間爲詩歌自娛。荊州自袁宏道倡卑靡淺俚之體。鄉曲翕然從之。繼復蠱于鍾惺譚元春之說。詩品愈下。處士旣交陳君。遂大變鄉人之習。一以唐人爲師。然每多感時嫉俗之言。輒自焚其草。以是存者僅二卷。自趙君釋處士于負芻。待之上客。世多以此爲處士幸。嗟夫。士爲知己者死。當胡公被難之日。刀鋸斧鑕。處士固甘心焉。使自改其節。以處士之才。何難力致通顯。則非處士之志也。彼夫

刀鋸斧鑕不足以動其心。而負芻又豈足以困處士哉。然處士不遇趙君。則憂愁困躓。其詩必不工。間有所作。不過與牛童馬走悲吟躑躅于荒山窮谷之中已耳。將來爲識者所賞。又賞者未極。海內賢豪之選。其言不信于當世。則處士之詩終不傳。傳矣。或不能遠且久。然則諸君子所以重處士者。雖由處士之才。足以動之。而趙君之賢。尤不可及也。已。處士生于某年月日。卒時年四十有六。娶左氏。無子。一女。甫四歲。趙君撫爲己女。銘曰。

乘爾塘。幾喪爾首。刈爾薪。忽釋爾負。溱沔之陽。雁門阜。吁嗟趙君。葬其友。厥銘惟實。庶永久。

張處士墓誌銘

永年有隱君子曰張蓋。字覆輿。一字命士。以能詩聞。工草書。寇亂後。謝去學官。弟子悲吟侘傺。遂成狂疾。嘗游齊晉楚豫間。歸自閉土室中。引酒獨酌。醉輒痛哭。雖妻子不得見。惟同里申涵光。雞澤殷岳。至則延入土室。談甚洽。其爲詩哀憤過情。恆自毀其稿。或作狂草累百過。至不可辨識。乃已久之。狂益甚。竟死。涵光輯其遺稿。僅得百篇。刻之。又襄其窀穸。以年月日葬君子某原。嗚呼。君詩人也。工之數十年矣。其五言詩尤高簡。力詣古人。而今之可傳示于世者止此。悲哉。斯人也。銘曰。

或游或處。或泣或歌。家室之不恤。而恤其他。彼狂者實邪。是維子之室邪。

文林郎知桃源縣事張君墓誌銘

仁和張生某與予相遇濟南將歸葬其親請曰吾先人之卒七年矣。饋粥之產猶足以營窀穸其過時不葬者懼銘之非人未足昭於後也。願得吾子之文納諸墓庶後之人得以考信焉。予辭不獲已乃按狀誌之曰君諱某字某其先世曰淑義者仕宋爲右正言從高宗南渡遂家臨安其後代有顯人曾祖某不仕祖某官南京禮部主事父某階奉直大夫知蘭州事母曰崔宜人崇禎十五年纂修玉牒君以貢士廷試駙馬都尉掌宗人府令萬煒以人才薦詔錄爲武英殿中書舍人李自成陷京師賊帥聞其善篆俾更書印篆君辭不能強之官不受拘繫七日脫歸後五年乃就試吏部除知桃源縣事縣濱黃河民困于夫役驛傳官馬多責民芻牧君至盡革其弊士有貧者調之金粟與揖讓甚恭然彊直自遂往往忤上官意竟以計吏罷職久之客游河南以疾卒于偃師年五十有七娶某氏子三人生爲之長次某次某女一適蔡某方君之罷官也攜其子女僑居江都生自河南扶喪歸殯君子山陽人或勸生葬君江都之鄉生不可卒營兆祖墓之側以某年月日封其藏可謂知禮也已銘曰

謂年宜永不躋胡者降於乙巳而終於辛丑謂祿宜豐解其章綬棄彼故鄉載之廣柳嗚呼斯人我用是傷丸丸者松下此陰岡肆乃祖乃父封穴在旁我銘維實逝者不亡

殷先生墓誌銘

先生諱岳字伯巖一字宗山姓殷氏先世自山西遷雞澤曾祖某祖某不仕父太白舉人仕至陝西按察

副使。母曰田安人。先生少蹶弛。然篤于孝友。與其弟淵。並負才名。崇禎三年。舉鄉試。後數年。省其親入蜀。值副使公由遵義知府遷今官。時流賊寇漢中。關南大震。分其黨伺副使江上。副使將之官。先生言曰。今逆寇充斥。若順流下。必墮賊計。乃請移檄興安。命吏卒迎于江。潛以數騎由萬山中出。夜抵興安。賊大驚。以爲神。會關臣楊嗣昌。以督師至。惡副使抗直。誣以違令。致賊突圍。當坐法。淵詣闕訟冤。不得白。而副使以病卒。先生再疏爲父乞遺骸。歸自漢中。及家。京師已陷。先生遁居西山。與淵討賊。事泄。淵被執。不屈死。永年申涵光者。素與先生爲友。留城中。聞賊索先生急。募死士夜馳與賊戰。脫先生于難。遂渡江。同游吳越。逾年乃還。吏部按籍除先生知睢寧縣事。布袍阜帽。騎驢至官舍。時兵革甫定。先生爲政。持大體。與民休息。治聲甚著。涵光遺書勸之歸。先生慨然曰。我豈以一官易我友哉。遂力請上官投劾歸。騎驢出縣門。學官某者。送之于郊。先生亟以朝參衣盡與之。仍布袍阜帽還里。所居鄉曰小砦。草屋三楹。與涵光晨夕唱和相樂也。先生爲詩。自魏晉下。屏不觀。尤不喜律詩。謂徒費對儷。無益性情。故平生所作。惟五言古風一體。莽莽然肖其爲人。遇佳山水。輒留連不去。游河南。愛大隗風土。思攜家往。強涵光爲鄰。涵光不果。乃已。鉅鹿楊思聖。以病留軹關。語先生曰。疾革矣。得傳青主藥。我庶其瘳乎。青主者。先生之友太原傅山也。時六月霖雨。疾馳水石中。五晝夜。挾之並至。蓋其重交游。趨人之急多類此。先生外和而內介。遇田夫野老。陶陶雜處。至見俗士。而斥之。未嘗假以色笑。讀書必窮義理。其拒異端邪說尤力。知睢寧日。有僧用鐵

釘木室。坐其內。募金錢。男女往膜拜。先生怒。欲焚之。僧叩頭乞哀。卒與之杖。里居有祠。曰三教堂。塑釋迦佛像于中。而孔子未坐。先生過之。恚甚。鬻所有田。改塑孔子於中。俾釋迦隅坐。僂僂若奉教狀。旣成。爲義學。以教鄉之子弟。先生產雖破。欣然意自得也。予客太原。與先生定交。每索予爲弟淵作傳。予未果。今年春。先生游福建。次桃源。猶寄予書。比予至京師。而先生凶問至。以六月日病死福州。距生萬曆年月日。享年六十有八。娶康氏。無子。一女。嫁松江府通判曲周張某。旣歸喪。涵光立其族孫某主祭祀。卜日葬之。副使之兆。且具狀來告。嗚呼。予未爲淵立傳。於先生之葬。是不可以無銘。銘曰。

諸處士墓誌銘

處士錢塘諸君旣卒。及葬。鄉之人共謀所以易其名者。曰。士之有私諡也。古也。君潛德未顯。宜有諡以昭來世。則曰。君年二十遭父喪。三十六而妻死。竟不復娶。事母三十七年。未嘗晨昏去左右。母語人曰。是兒五十餘。髮頽白矣。乃戀我如五六歲者。諡法。能養能恭曰孝。君有焉。衆皆曰。可。則又曰。君之棄諸生也。年未四十日。以文酒自娛。閉戶不出者二十載。先是崇禎間。歲大祲。民餓死相藉。君家無盎斗儲。爲粥覺苑寺。以食餓夫。瘞族人死者一十六。又上救荒三策。開米禁。行改折。設義倉。監察御史從之。全活甚衆。其後兵相持江上。白骨滿道。人不敢收。君出私錢。悉掩之。六和塢下。南贛巡撫某。移官浙江。與君有舊。君卒。

不往見諡法。好廉自克。曰節君有焉。衆皆曰可。遂諡君孝節先生。於是君之子九鼎。以狀來請誌。朱尊彝曰。是足以誌君墓矣。君諱玄振。字以默。一字麀倩。生而有文在手曰丰。故又自號丰山。曾祖某。祖某。考某。俱有文行。母張孺人。配程氏。生子男二人。九鼎。匡鼎。皆知名。女一人。嫁王某。孫男三人。辛發。壬發。酉發。女五人。君生某年月日。其卒也。以某年月日。年五十七。孺人程氏。後君十月生。先君二十一年卒。年三十六。年月日。合葬于靈隱山之陽。實先世之兆。銘曰。是惟諸氏之阡。永吉无咎。鼎也。藏孝節先生之匱。妣附其右。於戲。

歸安縣儒學教諭馮君墓誌銘

年月日。歸安縣儒學教諭馮君。以疾卒于官舍。年七十有四。其子金濬舉。樞歸。貧不克葬。後若干年。葬于某原。馮氏世爲嘉興人。君之曾祖某。祖某。父某。皆不仕。君少好讀書。有孝行。父病。醫言割股可療。君遂如其言。母疾亟。亦如之。補秀水縣學生。工時文。兼善韻語。與松江王廷宰。慈溪劉繩之。同里項真同學。真推餅山大宅舍君。序其排輯無事編。雕刻行之。顧省試輒不利。年六十五。以歲貢試京師。又二年。銓授紹興府儒學訓導。歷七年。遷于歸安。未朞而卒。君平居好爲善言。以勸鄉里。徙宅者八。之官者再。所至鄉之縉紳耆老。門生弟子。聞其言。輒目爲善人。無異詞。嘗村居。過鄰人飲。鄰有怨家爲盜。率其黨來報仇。盜先至。闕鄰人戶。見君方持酒。數以善言勸其鄰出。戒其黨勿入。君歸及舍。盜殺鄰人妻女。火其廬而去。嗚呼。自

世日降。躬行之君子。吾不得而見之矣。苟出其善言。以導人爲善。抑其次也。夫盜至不仁。猶感君言之善。相戒勿入。況夫吳越之士。聞其言有不遷於善者哉。則君之所施遠矣。君諱鎮鼎。字子晉。初名亮。嫌與古同名。乃更焉。娶俞氏。早卒。再娶胡氏。賢而無子。君有子一人。金濼也。女五人。其一歸于我。銘曰。言之善。行乃踐。遇則蹇。施諸遠。誰爲銘。其女夫。尊華名。姓者朱。

朱開仲墓誌銘

君姓朱氏。諱扉。浙江嘉興縣人。曾祖某。祖某。考某。俱不仕。君少有文。自以多病不娶。好覽方書。知醫。旁通釋氏旨。屏去肉食。遇讌會。強之乃至。進杯酒而已。方予避兵練浦。君居南村。予村北。每相值。覽予詩。欣然肯和。予病。爲治藥。裹留終日不去。憂見於色。屋三楹。井竈之外。薪數束。粟一盎。篝燈布被。無餘物。晨起淘米。躬執爨。恆留予共飯。去則鍵戶凝坐。以爲常。予旣徙宅梅花溪。漸與君遠。旣而游四方。歸輒出。及訪君。則已死。年若干歲。會其鄰欲瘞君。乃銘以納其壙。嗚呼。君雖學於佛。視飲食男女。無足動其心。然與之言。及父母存亡。輒歔歔不止。見人有疾。若己疾。蓋篤于行而有所不爲者也。銘曰。有男子。曰韓畱。生北平。旅江鄉。訪吾長水登吾堂。援琴操縵。彈清商。終身不娶。難意量。扉也。方之殆。曩友。絕嗜欲。宜老壽。胡二人。止盧首。我銘扉藏表畱名。開仲扉字畱石畱。

徐先生墓誌銘

崇禎三年秋。漳浦黃公道周來典浙江鄉試。榜既放。以力學勗門弟子。久之。公以言事獲罪。出至杭州。愛大滌山。治精舍著書。門弟子皆從講學。甲申以後。忠節則慈溪劉振之。而強錢塘姚奇胤。有僕經術則海寧朱朝瑛。美之。仁和孟應春。長民。餘姚何瑞。圖義兆。書法則嘉興汪挺。無上。而徐先生柏齡。節之以詩畫。頡頏其間。黃公贈以五言曰。節之貽我詩。十章大清脫。其賞譽若是。先生五試禮部不利。署永嘉縣儒學教諭。歲乙酉。兵部尙書張公國維督師于浙。黃公乞其師誅馬士英。阮大鍼。以謝天下。計不就。先生遇之。金華相對泣。下會南京破。黃公旋死于難。先生自甌間道入閩。一官轉徙。出入江海中。尋匿羅陽之天闕山。亂定始歸里。或勸先生仍與計吏偕。先生笑不應也。先生於學務博。經史之外。旁及三乘九籀。以及方書命訣穴法。靡不研究。黃公戒之曰。神仙我道之僕隸。釋典大學之灰塵。先生乃反約焉。迨身罹禍難。衝波潮。蹈鋒刃。幸而獲免。乃復參禪家宗旨。深自晦迹。蓋憂患之餘。有託然矣。徐氏之先。太宰諱德夫。從宋高宗南渡。傳至志善。明洪武中。舉賢良方正。其裔孫曰廷瑞者。先生曾祖考也。曰修職。郎恭城丞。霑者。祖考也。曰歲貢生弘源者。考也。曰處士弘澤者。本生考也。配潘氏。先生卒時年七十有三。子三人。燦心。某某。孫男六人。女二人。自處士以詩畫名。萬曆中。與李少卿日華。陳徵士繼儒聲相埒。傳有竹浪齋集。先生繼之。至燦心。三世皆善詩畫。論者以爲難。先生之葬也。燦心來乞銘。嗚呼。士君子生革命之時。義不事二君。流離困阨。其官閥行事。不多表見。則惟鄉黨後死者知之。然語焉而終不詳也。宋文信公死柴市。當時守

義不爲元屈者。皆其弟子賓客。作史者諱不書。儒生懷古。遠輯舊聞。爲遺民錄。猶憾其湮沒不傳者多也。黃公殉國。與信公無異。而先生實出其門。秉師之訓。終始不渝其節。安知後之論世者。不於國史之外錄。及遺民。則先生其一矣。是不可以無銘。銘曰。

仕有版官無廩。守師傳。遜靡悔。

孝子長洲劉君墓誌銘

君諱龍光。字蓼蕭。遠祖曰德基。自汴從宋高宗南渡。官黃州統領。居建康。其後曰順之。仕元爲平江路權茶提舉。遂家焉。曰政中。明建文元年鄉試第一。方公孝孺之所拔也。金川門之變。痛哭不食死。追諡靖節先生。嗣子曰鉉。歷官詹事府少詹事。卒諡文恭。其曰璫者。君之曾祖也。祖曰道。父曰廷諤。以宜黃縣丞遷益王府長史。遭亂。挈家人避兵白石嶺下。依其友姚肅甫以居。尋卒。君初以省試還里。兵後不知父母存歿。日夕涕泣。家故貧。徒步至建昌。訪益府故舊。無存者。禱于張令公祠。夜宿廡下。夢神告曰。寄居石漈。覺而詢之士人。蔑有知其處者。君持零丁帖彷徨道左。有一尼謂曰。是在閩粵之交。官路方構。兵道梗塞。由僻徑以往。七日可達。君如其言。越藤峽。通仙嶺。一綫天。皆崇山邃谷。潛狙虓虎所出入。末度白石嶺。路尤險惡。嶺萬仞。蟻旋而上。下臨絕壑。又萬仞。得微徑。棘荆蔽之。血漬足踝。力盡乃登。俯視山下。有村。村中板屋三楹。流泉決決鳴石上。君心動。以爲石漈也。叩其戶。則母管孺人出焉。喜劇而哭。問父所在。則亡踰年。

矣。又大哭。問殯何地。則在板屋中。又哭。村民聞哭。皆來觀。曰。吾鄉宋時有孝子王龍山者。於此見其母。故堡以見母名。今子復見母此地。是亦孝子矣。於是君謀歸喪。肅甫首以白金爲助。村毗咸樂用力。藤束其棺。以百夫舁之。踰嶺而下。遂浮江以達于里。監察御史李森先巡按江南。欲聞之于朝。君曰。常事耳。不可。乃止。君歸十年。母卒。喪葬盡禮。平居好讀書。研精小學。旁通醫術。以及風角地辰。截壬遁甲之說。靡不考索。康熙十一年元日。筮得大過之蹇。歎曰。過涉滅頂。吾其不免乎。是年十一月果卒。年六十有四。娶沈氏。繼娶吳氏。子男二人。椿齡。石齡。女一人。壻俞同珩。孫男女各一人。石齡與予善。君之葬也。來請銘。銘曰。孝之至。通神明。身雖隱。名則光。吾友其子。銘其藏。卜茲幽宅。斯永臧。

文學沈君墓誌銘

君姓沈氏。諱進。字山子。初名馭。補學官弟子。更焉。先世有仕元官。提舉諱福一者。自湖州徙嘉興。居城南放鶴湖。其子品一。避楊完者兵。始遷梅會里。曾祖考朮。祖考文輝。考福基。世有隱德。君年十七。工時文。要非所好。既交予。日以詩篇酬和。鄉人目曰朱沈。錢塘陸圻。過予書屋。遇君。將揖。問何人。予稱字以對。圻大聲曰。得非梅花高館落。春草斷垣生之沈山子乎。曰是也。遂留飲。盡歡而散。未幾。予南度庾嶺。君乃結同里周箕。賦古今詩。合成一帙。鄉人復以周沈目之。箕好周人急。獨君一介弗取。惟招之飲。不拒。然坐有惡客。聞惡言。憤不能平。張目變色。使酒面詆謔。勿顧也。平居不憂貧。見箕貧。則憂之。語人曰。谷風之詩。忘我

大德。思我小怨。夫人受恩于人。本無可怨。思之思之。而怨生焉。祇見其小而已。或曰。君蓋有感于中言之。君爲文。先民是則。故每試不利。同學故人有以舉子業致位通顯者。雖遺君書。置勿報。一旦訪予京師。數過予旅話。俄而六街捐溝。惡其穢濁。騎驢一頭。蹙躡返歸。自號知退叟。所居藍村。力圃。屋三楹。主人毀其一。力不能補。因目曰半巢居。教子翼讀書。手自抄錄。陶然自樂也。所著有文言會粹。行國錄。東園詩。藍村稿。半巢居稿。退叟行吟。力圃蕭閒詞。袁溪文稿。共三十餘卷。君晚適館于桐鄉汪氏。並坐飲。常杯入手。無疾一笑而逝。年六十有四。先娶朱氏。再娶章氏。繼又娶鄭氏。海鹽人。有儉德。事必先爲之備。君沒後。持門戶一十五年。畢君未竟之志。葬其舅姑。課子娶婦嫁女。皆以禮。卒年六十有六。子男一人。翼也。居喪盡哀。甘露降于壘廬。藤蔓者三人。稱其孝。女四人。一嫁陳丹膺。一嫁李某。一嫁繆啓武。一嫁朱丕戴。子從孫也。孫男三人。女一人。年月日。翼奉二人。匱葬生字圩之盛家橋。銘曰。

魯經取人。必也狂狷。有所不爲。斯擇之善。思我故人。庶幾可入作者之林。獨行之傳者乎。

處士文君墓誌銘

康熙四十有三年夏四月。處士長洲文君點。以疾卒于郊西之竺塢。其子赤病。不能擗踊。涕洟被面。醫言心已傷。不可療。踰月亦卒。所居丙舍三楹。遺孫永泰。張帷堂于中左。虛其右坐賓客。四方來弔者。咸稱其善居喪。克盡禮云。文氏之先。自廬陵徙衡州。載徙徐州。復自徐徙杭。居吳。自社學教讀。惠始。惠子涑水儒。

學教諭洪。洪子中順大夫知溫州府事林。林仲子翰林院待詔徵明。徵明子國子監博士贈文林郎彭海。內所稱三橋先生是已。是爲君高祖。曾祖元發。朝列大夫。同知衛輝府事。祖震孟。累官嘉議大夫。禮部左侍郎。兼東閣大學士。贈尙書。諡文肅。考秉。承廕官生。經亂隱居不仕。妣申孺人。廣西布政司右參政用嘉之女。君幼能詩。從長者泛石湖。有長橋連月湧。遠水隔山分之句。坐客交歎賞。年十二。寇陷京師。君泣曰。國破矣。奚以家爲。旣而仲父乘授命。產果破。乃依墓田以居。盡屏時文。肆力詩古文辭。兼縱筆爲山水人物。善鑒者以爲不失高曾規矩也。執親喪三年。止酒徹肉。晝夜居于外。服除。祀事惟謹。朔望肅衣冠拜宗祠。遇忌日。雖風雨必返祭。兄然。爲逋賦所累。君轉貸親懿輸之官。兄子作客還。不以言也。年四十。涉江淮。溯河洛。薄游京師。京師貴人或告君曰。子之先世多以薦授官。子曷仕乎。當以國子博士薦君。君謝曰。士各有志。行止亦有時。公何忍強點以不可乎。遂引去。君素無恆產。暇嘗舍蓮涇。慧慶僧寺。賣書畫自給。有富人子。具兼金求畫。期以三日。走取。君恚曰。僕非畫工。何得以此促迫我。擲金于地。其人再請。不顧。至嘗熟畫家。請觀箚中畫。君曰。若以賣畫者目我邪。何觀爲。倒巾箱示之。無尺幅也。巡撫湯公斌。屏車騎入寺。問爲政之要。君曰。愛民先務。在去其害。如虎丘采茶。府縣吏絡繹徵辦。積弊有年。公能除之。卽善政矣。湯公乃伐其樹。公嘗語君曰。聞先生止存田三畝。何以爲饘粥計。君對曰。貧者士之幸也。菜羹蔬食。足以安人性情。堅人操行。少或有餘。將移所守。負先世家誠矣。公稱善。一亭戶擁厚貲。以千金爲君壽。請通姓名。

于湯公。君曰：湯公以道義交我，我豈可以利干公。縱我有請，公不應也。若無故以貨餽人，傷惠。我無故受貨，傷廉。二者交失，毋敗吾名。亭戶慙而退。君內和而外嚴，口不道人過，其爲善孜孜若不及。鄉賢楊禮部循吉墓在洞涇橋南，久爲芻牧場。君與其友伐石爲表，植以松楸。寒食則攜酒榼以祭，又請建三講官祠于虎丘之右，以祀厥祖。其二人則陳文莊仁錫、姚文毅希孟也。君爲學熟習典故，與人談娓娓不倦，獨不喜世儒講學，謂書生上不能致君堯舜，下不能施德于民，載道無文，退而講說性命，所行所爲，事虛文而寡實行，借以文飾其自私自利之心，亦何取焉。君子謂切中俗儒欺世盜名之病，晚修文氏族譜，本溫州守之訓，謂人立身自有本末，出處自有據依，何必附丞相信公以爲重，故自蘇州分派始。一世二世至十一世，族譜甫成，而明年君逝矣。悲夫！君字與也，晚自號南雲山樵，所著文集四卷，詩集十卷，娶丘氏。先君八年卒，子二，堅、早。天赤，字周鳥，有石室山人集五卷，讀史記疑二十卷。孫二，永泰、永豐。君之將卒也，遺命永泰屬予銘其藏。當天啓二年，先文恪充會試總裁，文肅公試禮部，名在弟子之列。兩家締世好，君與予交尤篤，分不敢辭。君嘗好予五言詩，按潘昂霄金石例，王行墓銘舉例，銘辭無作五言者。然洪适隸釋所載，自漢世已有之，爰作銘曰：

崇禎十七載，宰輔五十人，文公宣麻日，朝士氣一伸。五旬拂衣去，人亡國胥淪。有如陶公侃，宜有泉明孫。點也式祖訓，不以富易貧。瀟灑弄翰墨，澹泊棲松筠。雖曾客京洛，素衣屏緇塵。伊人洵難得，可宗亦可因。

曝書亭集卷第七十四

誰搜遺民傳庶其考吾文。

曝書亭集卷第七十五

墓誌銘二

奉政大失提督福建學政按察司僉事山陽陸公墓誌銘

公姓陸氏。淮安山陽人。諱求可。字咸一。別字密菴。又字月湄。曾祖考某。祖考某。考某。妣某氏。順治五年。以禮記舉江南鄉試。後七年。登史大成榜。賜進士出身。明年。除知裕州。三載報最。入爲刑部員外郎。歷郎中。以按察司僉事提督福建學政。任滿稱職。應遷布政司參議。需次還。年六十有二。康熙十八年七月。以疾卒。兩遇覃恩。初授奉直大夫。再授奉政大夫。配某氏。某官某子。某官某孫。某官某曾孫。封宜人。後公十六年卒。又四年。與公合葬于某原。公于事親。主愛敬其身。謂身誠而事親之道可盡。身也者。父母之身。子孫所從出也。能愛敬其身。而後能勤學。能勤學。而後所交皆敬身之士矣。于擇交。謂朋友之義。貴恕以處之。不當自居于薄。夫牆薄則壞。繒薄則裂。器薄則毀。酒薄則酸。未有薄而可久者。于居官。謂君子所養。要令暴慢之氣不設于身體。必操切擊斷之意少。而平易中和之政多。理爲事之本。事爲理之用。臨事不爲私意所動。所藉平日有居敬窮理之學然矣。于學術。以主敬爲先務。而本乎治心。言必述六經。多師以爲師。而所宗者朱子。餘錄其長。去其蔽。上自象山。下至陽明諸弟子。未嘗槩事排擊。持論甚平。要其大旨在兼

善天下。故施之于政而政舉。觀之于文而文化成。自裕州以後。恤郵丁。減鹽引。闢污萊。清冤獄。正文體。絕請託。端士習。修祀典。力行教化。孜孜不少倦。蓋儒者講學之效。見諸行事者。公有焉。公著密菴詩集十卷。文稿一十六卷。詞選六卷。語錄四卷。子五。男三人。志謹。歲貢生。候選國子監學正。志寬。太學生。志默。亦歲貢生。女二人。孫男六人。女七人。公之葬也。未刻銘于幽宅。志謹請于葬。遂爲文誌公墓。鑿之丙舍之壁。銘曰。

舜跖之分。差以毫釐。有恆斯善。惟聖是晞。苟或舍旃。取徑則歧。平旦之氣。反覆牾之。陷于禽獸。其幾孔危。公列以圖。善利從違。性根于心。四端匪昧。若火始然。若泉始濡。由茲生色。睟面盎背。苟或不然。形體交頽。曷不由聖。混濁是汰。公列以圖。所養者大。世之學者。執一不通。仲宋抑漢。伐異黨同。公探理窟。六經是宗。濬源濂洛。達之湖江。人善我取。人惡罔攻。一話一言。振惑發蒙。豈惟空言。施諸實用。有鑑畢照。有慮必中。簡彼征徭。迨其疾痛。嚴乃不苛。寬以毋縱。君子所莅。式歌且誦。泊乎歸田。著錄彌衆。旣稱循吏。亦曰眞儒。實也久充。名亦不虛。有子有孫。克守其初。井此吉壤。樹以粉榆。旣安旣固。慶則有餘。我銘公藏。勿罔勿諛。奉政大夫吏部考功清吏司郎中顏君墓誌銘

顏氏望曲阜。自路回。父子事孔子。孔子弟子受業。身通者七十有七人。顏居其八。回雖天。其子孫特蕃。由漢迄今。多以忠孝文學著。路傳六十六世。曰胤紹。崇禎中。知河間府事。城破自焚。其子伯璟。鄉人私謚孝。

靖先生。彝尊嘗表其墓者也。伯璟娶朱氏。鎮國中尉某之女。兗州破日。爲邏卒所驅。以刃劫之。不前及。刃擊臂。臂折。罵不已。乃殺之。牆下。歷四日。復活。君朱出也。生崇禎十三年正月。甫三歲。亦陷亂軍中。乳母孫抱之。得出。九齡。工行草書。十三。嫻詩賦。旋補四氏學生員。以副榜入國子監。康熙二年。舉鄉試。六年。成進士。除國史院中書舍人。會天子幸太學。加恩四氏子弟之仕于朝者。遷君禮部儀制清吏司主事。明年。充會試同考官。出監督龍江關稅。既還京師。尋調吏部稽勳清吏司主事。奔父喪歸。服除。補驗封清吏司主事。加一級。歷本司員外郎。遷驗封司郎中。封奉政大夫。未幾。轉考功司郎中。充一統志纂修官。康熙二十五年。九月。晦。以疾卒。年止四十。有七。君長身廣額。早慧。好讀書。折衷羣儒言。自出新義。其于大學章句。持論尤斷。詩。媿漢魏南北朝。唐宋元明諸家之長。有集若干卷。又述音正音變訓蒙文釋家訓若干卷。獨不信浮屠星命之說。嘗曰。軀體猶炭也。神氣火也。火傳于炭。然後能爲功。顧其勢漸消而不可止。則生氣之鼓盪也。夫炭當風則易燼。扇之則立燼。置之密室。覆以灰。則後燼。要未有不燼者。然則謂人可長生者。妄也。謂死有時。不可先。不可後者。亦妄也。君子以爲篤論。雅善鼓琴。精騎射。踢鞠。旁通勾股訣。尤耽山水。西登太華。循伊闕。南浮江淮。觀濤錢唐。泝三衢。凡所游歷。必命畫手爲圖。得金石文。恆懸之屋壁。性孝友。勤于睦族。居鄉以禮讓。人立朝。遇政事侃侃不阿。有一善。未嘗自矜也。君諱光敏。字遜甫。更字修來。別字樂圃。妻孔氏。封宜人。子肇雍。國子監生。女子四人。俱配士族。君卒之明年。肇雍以君之喪歸。卜葬于曲阜。

將發。叩彝尊之門。杖苴請銘。彝尊與君交二十年矣。君之葬銘何敢辭。系曰。生乎陋巷之里。歿乎宣武之坊。葬乎侍郎之林。祭乎復聖之堂。年逾強仕。不爲夭也。秩以大夫。不爲小也。吾銘君藏。久而有考也。

儒林郎戶科給事中邵陽王君墓誌銘

儒林郎戶科給事中邵陽王君。以官卒。其弟又維聞君喪。重趺至京師。將扶君之柩以行。抱其遺孤鳩。凶服立于門。請秀水朱彝尊銘君之墓。彝尊不敢辭。序曰。君諱又旦。字幼華。別字黃湄。自曾祖結以上。爲農百良村。祖必昌。始讀書。補學官弟子。多善行。鄉人私謚爲孝惠先生者也。考圖南。以君仕。封文林郎。君少學于仲父斗南。博通六經。順治十四年。以易舉于鄉。明年會試中式。又明年殿試。賜進士出身。當授推官。未除。改知安陸。潛江縣事。潛江居漢下流。長隄透迤。百里。水防一決。禾黍盡沒。君躬巡隄上。先事預治。又田畝租賦徭役。多苦不均。君以鄉規田。以田均畝。以畝定賦。於是無田者得免役。逃移悉復其居。期年。百廢具舉。乃建傳經書院。以課士。築說詩臺。葺操縵軒。以燕賓客。會軍興。縣當達道。羽騎絡繹。君峙糗糧。芻菱無後期。旋以治行徵詣闕下。需次除給事中。俄聞父喪。奔歸里。讀山中條山之陰。芝川之上。服除。補吏科給事中。轉戶科。掌印給事中。典廣東鄉試。嶺南物產繁富。珠香象犀滿城市。遊者踵接于道。君以奉使闈事畢。偕番禺處士屈大均。入羅浮山。旣出嶺。復登匡

廬比還朝。詩卷外無長物也。花山接峒人壤。土寇結連。出沒劫商旅。君疏請建縣治。設官吏。廣州四縣。交賴以安。君性純孝。執親喪盡禮。與諸弟同居。未嘗析爨。奉錢所入。悉以委之。性嗜書。詩義尤所好。嘗錄李樗黃種詩解累萬言。又博求宋元人說詩善本。將輯成一家言。未果。惟詩集十卷傳于時。其詩兼綜唐宋人之長。獨不取黃庭堅。人有佳句。輒賞擊不已。江都郝士儀善詩。隱于賈。君與爲友。士儀死。哭以詩甚悲。又歎人吳周賦杜鵑行。君見之驚歎。周死。君序其詩。鏤板傳焉。卒之前十日。語其弟子朱載震曰。吾年五十一爾。精力早衰。慮不久人世。人亦何苦卒于官。吾將假歸已。營祠堂于宅居之東。祀吾祖考。擬以仲文配焉。請秀水朱十考禮以爲之記。記成。吾其歸哉。蓋君疾止七日而死矣。嗚呼。恫矣。娶范氏。繼娶張氏。俱封孺人。子二人。長鷄。殤。存者鳩也。女二人。一嫁潼關衛楊楫。一許韓城賈締芳。未嫁卒。一尙幼。銘曰。勿將者年。未達者官。惟其詩足傳。名以不刊。

掌京畿道監察御史任君墓誌銘

君諱珮。字少玉。別字希菴。姓任氏。其先家大梁。宋世有知高密縣事者。留居焉。名其里曰梁尹社。曾祖某。山西太原府通判。祖某。縣儒學生員。考某。贈承德郎。監察御史。妣鹿安人。君中順治十四年鄉試。明年會試中式。聞父疾。亟歸。父沒。治喪葬盡禮。十八年。服除。補殿試。賜同進士出身。知汾州石樓縣事。六年。多惠政。擢浙江道監察御史。巡視西城。京倉長蘆鹽法。回掌京畿道事。京師坊市勢豪。多以私錢牟重息。有印

子墜子轉子之目。貧民稱貸者不勝其苦。君告示禁之。廣西亂初定。錢糧帶徵未完。逃亡者相逐。君疏請蠲之。又言桃源以北。河無支流。祠堂邸家諸湖。舊以瀦水。今多淤塞。宜乘水患未至挑濬。庶河流不致潰決。又言滇黔既平。各營鎮冗兵議裁。裁之不得其道。則爲患日深。宜消其迹于無形。不可使曠久。生姦宄之念。其後河決宿遷。而武昌裁兵。殺官吏。據城叛。論者始服君先見也。君善書。朝回摹仿晉唐書法。語人曰。吾以收其放心爾。其巡視長蘆。都人士賦驄馬行送之。君獨賞予作。旣還朝。以所購懷素草書千文。趙孟頫時苗留牘圖。屬予審定。跋其尾。其冬盜入予室。竊之以去。君聞之。勿恚也。遇予慈仁寺。謂曰。物之失得。亦有定數。是卷流傳數百年。藏者豈吾一人哉。因請更跋他卷。蓋其達觀如是。君以明崇禎五年六月日生。康熙二十六年四月日卒。享年五十有六。娶閩氏。贈安人。繼娶丁氏。封安人。子男二人。筠。歲貢生。墳縣學生。坪。康熙二十年舉人。知名于時。女三人。壻某某。君之歸喪也。坪來。凶服立于門。請銘君墓。及葬。乃爲銘曰。

生乎齊而視齋。鄉黨以爲光榮也。守其官而遽卒于官。親懿之所屏營也。城曰介根。水曰濰膠。卜茲幽宅。千齡不朝。

知伏羌縣事蔣君墓誌銘

文林郎知伏羌縣事蔣君之葬。秀水朱彝尊因其子之請。誌其墓曰。君杭州海寧人。早慧。十齡赴童子試。

未冠補學官弟子。崇禎九年舉鄉試。出建昌新城黃公端伯之門。三試禮部不利。歸闕一畝園于南村。蓋無意于仕矣。吏部按籍授縉雲儒學教諭。縣經亂。無學舍。乃僦居樊氏宅。宅故延平訓導臯所遺。有天際樓。羣山羅列案前。臯詩所云。烏白蔭我牆。白茅覆我屋者也。君乃講學會文。拔麻成璋。鄭載颺于諸生中。後先取科第。有李華者。獲罪。知縣事汪宗魯。欲申上官黜之。君請于汪。不聽。淚成行下。汪問故。君曰。華孝子也。曩遇寇。伏草中。其父負大母逃。寇將殺母。父請代。華乃躍出。求代父死。寇並釋之。願明府毋黜華以教孝。汪爲感動。裂其牘。君性耽山水。涉惡溪。梯陽谷。周覽桃花之隘。芙蓉之嶂。縣境諸山。旁及于天台孤嶼。迨遷知伏羌縣。考稽禹迹。積石。朱圉。所至題名于壁。縣臨極邊。年饑。流移載道。覈徵輸之數。積逋三萬五千。君憫民疾苦。言之上官。請豁。上官不允也。又請革除濫徵夙弊。勒碑衢道。巡撫允焉。於是司府怒不可解。誣列君罪狀。巡撫以爲過。奏彈文曰。知伏羌縣事。薰處凋殘之地。雖無苛政及民。然性近迂闊。賦詩立碑。催科不力。宜加處分。爲曠職之戒。先是。知成縣事。錢唐吳君山濤。岱觀。以同谷在境內。建七歌堂。作粟主以祀杜甫。亦爲巡撫所糾。先後罷官。傳者以爲佳話。其云賦詩者。濫徵既除。縣民猶有抗不輸糧者。君作詩勸之。立碑者。卽革除濫徵衢道碑也。君既落職歸。自稱南村退叟。布衣席帽。徒步瓜塍麥隴間。終年不入城府。日以詩文自課。合少壯所作。多至萬篇。手自汰除。猶存五千餘首。其言曰。作詩大義。以言志爲本。六朝詩不必學漢。唐不必學六朝。宋不必學唐。元不必學宋。今人亦何必宋元是學乎。君之歌鹿鳴。

也。一榜詩人最盛。仕而達者。曹公溶鑒躬。王公庭言遠。而鄞有萬泰履安。周齊曾唯一。杭有金堡道隱。徐之瑞蘭生。禾有巢鳴盛。端明咸高不事之節。君旣退歸。自處仕隱之間。諸君酬酢靡間。又與曹王兩公居相近。琴歌酒坐。應和不乏。特不與馳騫浮名者相接。故其詩文不甚傳于時。第取自怡悅而已。君年八十有四而卒。娶姜氏。子男二人。名世歲貢生。名表。國子監生。女五人。壻褚蔚文。殷光遠。吳源達。周文焜。沈朝英。孫男六人。女三人。葬某縣某原。銘曰。

學焉而爲經師。仕焉而稱循吏。文達夫辭。詩言其志。嗚呼先生。惟不務名。而名自至。吾言不誣。信于百世。

工部主事席君墓誌銘

君姓席氏。先世望安定。遠祖武衛將軍溫。避黃巢亂。渡江徙于吳。居洞庭之東山。曾祖洙。祖端攀。皆不仕。以孫子本楨貴。推恩均贈太僕寺少卿。崇禎之季。寇賊構患。歲旱蝗。人相食。本楨饒貲財。發其橐白金八千兩。糴米于襄樊。輓之以舟。順流下。東賑青兗。南散給吳越。全活者無算。而又請毀家以佐軍儲。巡撫應天。都御史分宜黃希憲。聞于朝。特授文華殿中書。尋加太僕寺少卿。階亞中大夫。君本楨之季子。諱啓寓。字文夏。以國子監生。援例補工部虞衡清吏司主事。皇朝設六部。職掌多準明代。獨工部四司。每受制于內務府。一失其意。雖材美工巧。不以爲良。而虞衡掌山澤之禁。鼓鑄之局。驗試之廳。盔甲之廠。除道捐溝之役。事最繁瑣。主者恆救過不給。君遇人以和。與物無忤。甫涖官。兼攝營繕屯田二司。庶務悉理。旋吏議

鐫級留任。尋加二級。覃恩勅授文林郎。贈厥考如其官。封母延太孺人。旣而請假養母。以所居僻左。獨學無友。乃徙宅常熟。春秋佳日。板輿奉母往來。題其圃中居曰娛暉之堂。滋蘭樹蕙。周覽湖山之勝。歲己卯。御舟渡太湖。親幸其圃。君拜伏階下。天子顧問曰。爾年方壯。何以不來供職。巡撫都御史宋公榮對曰。是以終養其母。請回籍者。天子爲之霽容。手摘盆中蕙蘭花登舟。明年。延太孺人卒。君居喪盡禮。終三年未嘗去衰麻齒肥甘也。服除甫七月。而君卒。享年五十有三。君家居以孝友敦睦聞鄉里。及在京師。遭季父喪。解官持服歸。修族譜。置祭田。立義學。人有稱貸者。未嘗權子母。質庫不計錙釐。人咸樂其寬厚。少問業于華亭葉生有馨。生固幾社名流也。予友平湖陸君隴其。學以躬行爲本。旣釋褐。知嘉定靈壽二縣事。循行居天下第一。徵入試四川道御史。以直言放還。君夙與訂僑札之分。具書幣聘之至家。教其二子。永恂前席。陸君沒。君厚賻其喪葬。申以昏姻。集其遺書。悉爲開雕行世。暇又輯唐人詩百家。亦鏤版行之。天子幸第時。曾進乙覽。一時言詩者。返之正音焉。永恂前席。俱歲貢生。亦從予游。君之葬也。兩生來請銘。嗚呼。躬行之君子。吾見罕矣。以言乎論學。則以正。以言乎取友。則必端。以言乎仕進。則知止。蓋得夫陸君講習之益者多也。是不可無銘。辭曰。

古之葬者。窆用石。贈書方。遣書策。後乃納銘于丘阿。辭苟達。不在多。席君新阡頂山麓。治繭室。封斧屨。樂哉斯丘。無後艱。宜爾子。宜爾孫。孰銘其藏。小邾氏。匪異人。陸君友。

曝書亭集卷第七十六

墓誌銘三

孝潔姜先生墓誌銘

慈谿姜君宸英。詩文傾折海內士。天子知其姓名。然屢赴鄉試。不見錄也。旣而用薦入史館。支正七品俸。纂修明史。又分撰一統志。月給餐錢。衣儒生衣。維坐公卿之次。會覃恩。勅授文林郎。贈考妣如其階。歲在己巳冬。刑部尙書總裁官崐山徐公乾學告歸。詔許以書局自隨。公上言引君自助。於是君將還葬。其考孝潔先生。于夏家壩華益山之陽。妣孫孺人祔焉。持狀請葬。尊誌其墓。誌曰。先生諱晉珪。字桐侯。別字卓菴。先世自蜀遷于越。居嵎縣。再徙餘姚。復徙慈谿。曾祖國華。丁士美。榜進士。累官陝西布政使。司右參議。階朝列大夫。贈太僕寺少卿。祖應麟。中先文恪公。榜進士。以戶科給事中抗疏。爭鄭貴妃冊封。謫典史。後歷太僕寺少卿。階中憲大夫。贈太常寺卿。父司簡。官戶部司務。母向孺人。妻孫孺人。先生少補儒學生員。貢于鄉。年三十七。不復應舉。研精理學。工詩。兼通六書。辨其源流。又嫻經世之略。性至孝友。愛諸弟。與人交愷易。然取與必以義。雖勢力不能奪也。太常公以廉節自勵。遺產僅百畝。司務君。累弟分受之。先生。累弟又三分之一。力不能給。饘粥。兵後家計益窘。無以爲親養。乃游學北至燕趙。東浮洛。西游秦蜀。束脩所入。

歸以養父母。孫孺人曲成其孝。一味不以自甘。必先進舅姑。曉問寢安否。庭闈燕衍。靡以異先生在家也。先生既遠親舍。歲時恆望鄉遙拜。發爲歌詩。多幽憂悱惻之言。音甚酸楚。今所傳泛鳧吟。橐是已。迨向孺人歿。先生適在旅次。訃至。嘔血數升。遂中失血症。服除。將之瑞州。道出常山。疾發。卒于草坪旅舍。時康熙十一年五月日也。年六十三。宸英扶其匱歸。先生之執友張能信。林三錫等交泣下。僉曰。君之事親。可謂孝矣。君之高蹈。可謂潔矣。遂私諡曰孝潔先生。先生歿後七年。孫孺人亦卒。孺人。國子監生之蒞之女。朝列大夫知德州事森之孫。贈朝列大夫某之曾孫。子男二人。宸英。宸芝。女一人。嫁儒學生員凌瑤。孫男三人。女六人。嗚呼。自先生制產之法廢。士之貧者。無以養其親。於是陟岵。鳴鶴。北山。蓼莪。四月之詩。作焉。雖不能養與祭。君子必以孝子目之。蓋惜其遇而憫其志之不得已也。先生之孝終。食不遺其親。願以貧故適四方。資僚友縞紵之貽。以供菽水。是亦潔白之養矣。子職未盡者。孫孺人以婦道成之。宸英又克繼其志。然則先生可無憾于泉下。而因行受名。庶幾克副其實者乎。於其葬也。宜銘。銘曰。

學焉而弗措也。才焉而不遇也。勞人之賦也。孺子之慕也。有賢妻爲之助也。有令子爲之嗣。存故反也。子未服官而贈及其親。天子之異數也。考卜于原。有龜者檀。有菀者枌。葬先生于是。嬪也。耐此幽宅。旣安。斯蕃衍而孫子。

贈日講官起居注翰林院檢討徵仕郎貞靖潘先生墓誌銘

康熙十有七年春。天子有詔徵文學之士。吳江潘君未。被薦。明年。召試體仁閣下。賦最工。以布衣除翰林院檢討。越二年。充日講官。知起居注。其冬。雲南平。天子推恩及臣下。於是君之考。處士貞靖先生。得贈日講官。起居注。翰林院檢討。徵仕郎。君之妣。章氏。贈孺人。母。吳氏。封太孺人。又明年。會試天下士。君與分校。得人最盛。又明年。遭劾。謫官。吳太孺人。歸卒于里。君聞訃。奔還。旋卜地。鸞脰湖之南。以康熙二十五年閏月辛酉合葬焉。先生諱凱。字仲和。一字豈凡。別字貽令。世居吳江平望市。曾祖雲。隱居不仕。祖志伊。中嘉靖四十四年進士。仕至廣西布政使司右參政。父錫祚。湖廣布政司理問。母吳孺人。先生事親孝。事兄最恭。其爲學。殫心經世之略。其文見稱于太倉張采。與同縣吳允。夏包捷。吳飴。文章行誼相切劘。補縣學生員。連試第一。當是時。在朝之君子。多自附東林。而海內名士。以聲氣應和。曰復社。先生與焉。周之夔者。與諸君子搆難。撫君過。作復社或問。而無錫馬公世奇。太倉張公溥。並力爭之。德清章君日烱。愛君文。以女歸先生。旣而知吳江縣事。先生深自退匿。未嘗干以私。惟於清賦額。疏水道。事關民利害。則建白行之。先生爲詩典雅。尤工赤牘。雖忽遽。不作草書。遭亂破家。遂屏棄時文。纂平望志及本草類方。合文集凡數十卷。子三人。檀。章。楨。吳。存者未也。女三人。一嫁周撫辰。一許嫁顏祜。未行卒。一嫁陳鏞。孫四人。吳太孺人在室。以孝聞。嘗刲股療母病。爲先生繼妻。撫前妻子。女如己出。旣寡。家酷貧。手紡績。延名師。訓未。以通經博古。及未爲侍從臣。太孺人未嘗美衣食。君旣謫官。太孺人無幾微不自得之色。曰。窮達有命。安之可矣。貞。

靖先生卒時年四十有九。章孺人卒年三十有二。吳太孺人年六十有六。葬尊與君定交也久。同年被薦。同以布衣授官。同知起居注。其謫也。又同時。熟聞君家世。於君請銘。不敢辭。銘曰。

相彼貞木。其實有蕢。或碎于地。或登于槃。而終以勿餐。嗚呼先生。旣昌而文。以詒後昆。阨窮奚怨。

贈翰林院檢討徵仕郎徐先生墓誌銘

翰林院檢討吳江徐君鈞。請假還里。葬其考妣于光字圩。逾年矣。旣而謫官去。屬同年友朱葬尊爲文表諸墓。銘曰。

君之先人韞奇諱。其曰季華冠而字。上世本居魏塘界。遷于吳江自碩始。西濛之港面積水。以耕以耨。治農事。先生爲儒試不利。仰屋著書抽腹笥。遯世无悶窮勿悔。兄當餽運渡江介。是時淮北人爲戡。先生愛兄心孔忤。以金三百輸諸吏。兄得不行方用慰。兄子曰鑛結壯士。以保鄉黨計不遂。亡命西吳全匪易。先生詣吏慷慨對。產雖破碎禍則解。嘗懷白金步入肆。人壓看場集如蠟。烏前蹴囊遺在地。誠以語人人作僞。探懷乃悟己所墜。發之銖兩皆默識。人慙欲以半相畀。先生怡然笑勿視。衡門之下可樂志。釀秫種花性所嗜。孺人王韓先生配。有子克家孫克類。伯也不仕仲委質。揚名顯親光有位。贈徵仕郎逼通貴。揭石于原表風義。猗嗟千秋永無毀。

小譚大夫墓誌銘

小譚大夫。吉璉諱舟石字嘉興人。以祖父嘗爲大夫。旣仕。以小譚大夫自別。大夫之祖諱昌言。山東布政司參政。贈太僕寺卿。父則五經進士諱貞良也。母宜人朱氏。是爲鼻尊之姑。大夫年十四通五經。旋補學官弟子。弱歲以文貢入國子監。南京不守。大夫從父母攜弟妹妻子浮海至會稽。復自台州抵福州。轉徙漳州。道遇寇。父被傷。大夫力以身蔽。寇拔刃睨之。不動。罇擊其背。不去。寇曰。孝子也。舍之。父病歿。家人三十口留亂軍中。斗米三千錢。卒全活。扶父柩還。尋以貧游學四方。客汝寧。聞母病。疾歸。則已蓋棺。大夫號踊。以頭觸棺。棺釘破其顛。血滯縷。旣絕而蘇。母喪除。入京師。以國子監生試第一。授弘文院撰文。中書舍人。晨出。敝裘羸馬入院。還坐一室。勘經史。有以詩文請者。立使者于戶外。削稿與之。仕九年。乃遷同知延安府事。治榆林。至則修學。建尊經閣。以十三經注疏貯閣中。從士子覽觀。又采儀禮參以本朝制度。行鄉飲酒禮。又援據史傳。旁及載紀。小說家。兼從宿將故老。詢流寇始末。成延綏鎮志二十四卷。康熙十二年。吳三桂叛。明年。大夫運關中餉十萬入四川。至寧羌州。兵變。殺經略莫洛。於是巡撫杭愛移駐漢中。追還所運餉。十二月。漢中食盡。王師退保西安。棧道絕。乃從黑水峪間道。七晝夜達整屋。旣抵榆林。定邊副將朱龍反。逼波羅堡。去榆林百里而近。大夫集士民于漢前將軍關侯廟。爲文誓侯前。願以死守。士民咸感奮。乃編什伍。明號令。製幡幟。嚴斥堠。夜自宿城上。衆藉以安。未幾。西川人周繼明聚衆千人。與神木叛將孫崇雅合。陷延安。綏德。勢張甚。榆林兵迎戰不利。運道塞。環城三十里皆賊壘。城中刮木皮采蒿以食。大

夫謀于上官。率私錢。命勇士。取徑渡黃河。買粟于山西之保德河曲。突圍以入。當是時。延安一府。縣十九。城堡三十六。相繼淪陷。惟榆林城獨完。圍既解。餘寇據響水清平鎮羅諸堡。大夫騎匹馬。喻以禍福。及神木崇雅。繼明皆降。事平。論功加一級。十七年。詔舉博學宏詞之士。有以大夫薦者。徵詣闕。既至。遷知登州府事。大夫之爲中書舍人也。有小夫供事內院。趨走若奴隸。既而其人從軍自效。以招降王輔臣功。超擢布政。爲登萊監司。大夫反。出其下。鬱鬱不自得。其人益自倨。屢以計傾大夫。卒爲所搆。吏議降二級。調用會大夫子有鋹。已納婦矣。而天。大夫悲不自勝。疾發。遂卒。譚氏之居。在香花橋東。其坊曰碧漪。堂之左有鴨脚樹三本。擗尊童子時。與大夫兄弟讀書其下。一日。語擗尊曰。詩書莫不有序。子知周禮亦有序乎。答曰。不知也。曰。尙書周官一篇。卽周禮之序矣。其讀書善悟類是。大夫好撰述。游昌平。著肅松錄二卷。又嘗著爾雅綱目一百二十卷。所爲詩古文辭。有嘉樹堂集二十卷。鴛鴦湖權歌一卷。卒之歲。年五十有七。娶李氏。女子二人。一嫁陸大勳。一嫁沈以機。皆國子監生。其葬也。在某原。銘曰。

生而逸。後乃勞。陸走叢箐。川波潮。文不遇。學則優。終爲右史。雄詞曹。長榆林。塞土礮。疏泉種稻。成樂郊。寇宄起。如牛毛。登陴以守氣。不撓。綰左符。亦足豪。屈首置下尻。居高嗟善人。壽宜多。生子短折命安逃。相斧屋。度隰臯。伐石書銘鑿諸幽。

唐制博學宏詞有科廢不行久矣。康熙十七年，天子法古，爰命內外大小臣工各舉所知，徵入都。於是浙江巡撫以海寧徐君林鴻應詔。明年春，召試太和殿庭，布席體仁閣下。中使傳旨，向來殿試進士，定例立而對策。今以爾等績學博聞，特賜坐，賜食，僉謝恩畢，既納卷。次日，天子行大蒐禮，次郊圻，束卷授三大學士暨掌院學士，定其高下。君時名藉甚，又與同里吳君農祥、王君嗣槐、吳君任臣、蕭山毛君奇齡，宜興陳君維崧，咸爲大學士。馮公延致邸第，都人所稱佳山堂六子也。僉謂讀卷者馮公，卷不彌封，君必見錄。及鴛旋命下，入史館者五十人，授中書者七人。君乃見遺。君子於是歎馮公之無私，尤服君之不肯干進也。君學通今古，凡山川險隘，錢穀鹽筴之出納，律令格式之寬嚴，皆總其要。又工于作奏，以是督撫大吏學使，齟使交引以自助。然取與不苟，館穀所入，不能治田園，所居破屋數間，清池半畝。時與故交把酒劇談，以爲樂。居幕府，削赤牘，晝夜多至百函，善寫人胸臆，賦才瀏亮。古詩音逼齊梁，近體和平婉麗，獨不愛曲子。有強以填詞者，倚聲歌之，陰陽悉中律。嘗客貴州，勸巡撫因民之俗，立瞿公式耜。張公同敞祠，爲作神弦迎送之曲。士人歡忭，華冠繡衣，擊銅鼓，鳴鐵篴歌焉。曲終，苗童犵女，皆感慨泣下。其于史事，尤練達本末，不曲徇黨人之論。分撰通志，發凡立例，綱目秩然。論者以君不與纂修明史之列，交惜之。君善鑒賞，別書畫禮器，僞真兼善。飲嘗過顧御史豹文別業，御史知君大戶，出靄尊貯酒，容一斗，賓客多避席。君連舉者三。御史曰：此何年製也？君笑曰：北齊文宣帝天保六年避暑晉陽宮所作也。驗其下款識，果然。知永嘉

縣事漢陽王君世顯。去官留杭州。處士南昌王君猷定。寓昭慶僧舍。先後客死。君視含斂。送其柩至江浦。乃還。太倉王徵士昊。慈谿周處士容。卒于京。君爲治喪。收其文集。以竢奔者。蓋君急于交誼。若是不獨以孝友稱門內而已。君之先本莆田林氏。後分支台州之黃巖。再徙海寧。贅徐氏。因襲其姓。曰輅。嘉靖庚子。舉人。仕爲福建永安知縣。君之曾祖考也。曰元倬。考也。妣某氏。君字大文。一字寶名。少補學官弟子。生某年月日。卒某年月日。享年六十有九。配茅氏。明按察副使坤之孫某之子。繼娶姜氏。封監察御史某之子。繼娶張氏。某官某之孫。處士某之子。君有子男四人。司祿。司錫。俱錢塘縣學生。司祿。繼從祖後。司紀。司直。殤。女六人。孫男二人。女二人。其葬也。于某原。某年月甲子。葬之日也。銘曰。古於制科。期收實學。天子曰咨。維元老是擢。嗚呼斯人。才與命妨。懷彼珠玉。被褐而亡。升者在朝。棄者在野。不有銘詩。孰知君者。

翰林院侍講尤先生墓誌銘

先生姓尤氏。諱侗。字同人。更字展成。別字悔菴。又曰良齋。晚自號西堂老人。西堂者。先生讀書之所也。先世家無錫。遠祖裘。以政事文學著。南渡初。詩家所稱尤蕭范陸是已。子孫世登臚仕。載萬柳溪邊舊話。其後轉徙長洲之斜塘。曾祖某。有隱德。祖某。舉鄉飲賓。考淪。國子監生。敕贈徵仕郎。翰林院檢討。亦兩舉鄉飲賓。妣孺人鄭。先生少日。博聞強記。有才名。補學官弟子。歷試于鄉。不利。貢于廷。謁選。除永平府推官。不

畏弼禦坐撻旗丁降調。康熙十七年春，天子仿古制科取士，或薦先生于朝，召試體仁閣下。上親擢五十人，悉除翰林，纂修明史。同日入院，先生最長，以齒序四十九人，皆坐其下。留史局三年，分撰志傳多至三百篇。覃恩授徵仕郎。子珍，以進士出身，改庶吉士。先生乃告歸家居，以詩文縑素請者盈庭戶。先生揮灑不倦，有求必滿其意。同時汪編修琬居堯峯，以古文自矜，少可多怪。見俗子議文章者，恆面斥之。以是人多畏縮，咸樂先生之和易也。歲己卯，天子南巡，先生入見，御書鶴栖堂扁額以賜。時先生年八十有二矣。猶康彊善飯，暇相地于官山之陰，築生壙，自爲之誌。結丙舍，曰艸艸山房，俾予分書。予嘗以天台萬年藤杖奉先生，并作歌以贈。先生喜劇，然猶未窘于步，不藉扶持也。歲癸未，天子復南巡，進先生官侍講。甲申六月日，以疾卒。距生明萬曆四十六年閏月日，享年八十有七。配曹孺人，有賢行。官右春坊右贊善兼翰林院檢討者，長子珍也。次瑞，縣附學生。女三人，一嫁縣學生湯萬焯，一嫁陝西提學按察僉事候補布政司參議陸德元，一嫁縣學生金秉寬。孫男一人，世求，以歲貢生考授知縣，以能詩聞。女五人，俱配士族。曾孫一人，先生名雖未登甲乙榜，早爲文社倫魁。弟子著錄者多。大學士崐山徐公元文其一也。所作詩文流傳禁籟，世祖惜其才命相妨，終受聖主之知。官之翰苑，屢承殊渥。今年春，舉尊詣杭州，偕前輩德清徐公倬謁見皇太子于行殿，令旨賜坐，謂曰：老成易謝，茲來又失一尤展成矣。字而不名，洵異數也已。先生著述甚富，所撰西堂雜俎，觀者胥悅。奉爲兔園冊，晚輯艮齋雜記。學者服其雅馴。全集五十四卷，餘集七

十卷。鶴栖堂稿十卷。俱鏤板行于世。銘曰。

士也懷才或不售。遭逢聖世終旁求。圭璋特達自有期。鶴書召君六十餘。俾入史局掌詞曹。君之才大筆不休。有若札札機絲抽。趨庭有子登亨衢。遺榮辭老返衡茅。難進易退世所高。君子故里恣逍遙。水哉之軒。蘭葉舟琴瑟。几杖官山幽。達天知命故不憂。鶴栖堂深御墨留。人生百歲語本虛。八十有七齒已優。著史況足名千秋。君今含笑歸山丘。吾銘維實言不浮。

承德郎日講官起居注右春坊右中允兼翰林院編修嚴君墓誌銘

康熙十有七年春。天子法古制科取士。詔在廷諸臣暨外督撫大吏各舉博學之彥。毋論已仕未仕。徵詣闕。月給太倉祿米。明年三月朔。召試太和殿廷。發題賦序詩各一首。學士院散官紙光祿布席。賜讌體仁閣下。於時無錫嚴君成省耕一詩而退。賦序置不作也。天子擢五十人。纂修明史。部議分資格。進士出身者以館職用。餘給待詔銜。俟史成日授官。詔下五十人。齊入翰苑。布衣與選者四人。除檢討富平李君因篤。吳江潘君耒。其二子及君也。君文未盈卷。特爲天子所簡。尤異數云。未幾李君疏請歸田養母。得旨去。三布衣者。騎驢入史局。卯入申出。監修總裁交引相助。越二年。上命添設日講官。知起居注八員。則三布衣悉與焉。是秋。予奉命典江南鄉試。君亦主考山西。比還。歲更始正月。幾望。天子以逆藩悉定。置酒乾清宮。飲讌近臣。賜坐殿上。樂作。羣臣以次奉觴上壽。依漢元封柏梁臺故事。上親賦昇平嘉讌詩。首倡麗日

和風被萬方之句。君與潘君同九十人繼和。御製序文。勒諸石。二月。潘君分校禮闈卷。三布衣先後均有得士之目。而晤閣應奉文字。院長不輕假人。恆屬三布衣起草。二十二年春。予又入直南書房。賜居黃瓦門左。用是以資格自高者。合外內交構。逾年。予遂挂名學士。牛鈕彈事。而潘君旋坐浮躁降調矣。君遇人樂易。好和不爭。以是忌者差少。尋遷右春坊右中允。兼翰林編修。敕授承德郎。時二十三年秋七月也。冬。典順天武闈鄉試事竣。君乃請假。天子許焉。當君未仕。愛縣西洋溪丘壑竹樹之勝。思買墓田。丙舍終老。溪有橋。曰蕩蕩。因自號蕩蕩漁人。時山陰吳公廷祚。方知縣事。許助草堂之資。會應召。不果。既出都。遂浮舟度嶺。訪吳公于肇慶。采硯而還。自是杜門不出。築堂曰雨青草堂。亭曰佚亭。布以窠石小梅方竹。宴坐一室。以爲常。君爲文無定格。不屑蹈襲前人。適如其意而止。詩篇沖融恬易。鮮矯激之言。慢詞小令。雅而不豔。所著秋水集。雜文七卷。詩八卷。詞二卷。嘗屬予序之。少工書法。入晉唐人之室。兼善繪事。山水人物。花木蟲魚。靡不曲肖。尤精畫鳳。翔舞竦峙。五光射目。觀者歎息。以爲古畫手所無。晚歲曾一修縣志。敍族譜。有以詩文圖畫請者。槩不應。暇輒埽地焚香而已。君年六十有一。返里居。以康熙四十一年正月卒。享年八十。先世自餘姚遷。無錫之嚴垵。曾祖朔。贈通議大夫。南京通政司通政使。祖一鵬。萬曆丁丑進士。累官刑部左侍郎。贈尙書。考紹宗。縣學生。以君貴。贈如君官。君諱繩孫。字蓀友。娶王氏。中憲大夫。知福州府事。□□之女。封安人。子三。沆。曾。塲。泓。曾。溶。曾。孫六人。曾孫五人。其卜兆也。在縣西蕭家灣。銘曰。

君之通籍也。天語諄諄。謂史局不可無此人。君之請假也。行將發軔。敕錄所撰詞以進。蓋受主知者深矣。蕩蕩之橋。洋溪之潯。秋水時至。比于君心。陸羽王紱。庶嗣其音。

曝書亭集卷第七十七

墓誌銘四

朝議大夫戶科給事中降補國子監學正趙君墓誌銘

君諱吉士字天羽一字恆夫姓趙氏世居徽州之休寧仕爲光祿寺丞諱廷賢者君曾祖考也贈昭武將軍諱完璧者祖考也封文林郎進階奉直大夫贈朝議大夫諱時腴者考也妣汪氏累封恭人贈淑人君入籍杭州補府學生順治八年舉浙江鄉貢進士康熙七年謁選知太原交城縣事縣居萬山中巖磴參錯孔河出塔莎谷東南流會于汾故水曰交水山曰交山縣曰交城地近屈產畜馬絕有力又饒灌木歲取其材以爲利君至日民間牧馬有禁上官廢南堡村木廠許沿河市賣由是利爲文水商民所奪交人重困往往去爲盜依山負固散則民聚則寇勢方張旁掠清源汾陽邢臺三縣君思翦除之首閱武于郭南令下士卒進退有序捐萬錢犒焉還語賓從曰民可用也會年饑君錄餓者七十人完廨舍垣牆使家人與處詢羣盜出沒所在多得其實爰申明乘墉保甲團練之法君乃言曰凶歲良民易迫爲盜吾當撫之遂詣河北都行荒政諭山農毋爲盜所脅日暮留宿陶穴詰朝相度蹊徑通塞村砦近遠知最險者三坐崖東西兩葫蘆川繞其下塞葫蘆口則官軍不得進保三坐崖則官軍不克登君默識之而還十年十

月朔。總督檄縣進勦。君行令山麓蒼靜安堡。期以月幾望。官兵進屯。先七日。置酒城隅。卻月湖。張樂于舫。許老穉夾岸縱觀。越宿。復要崑山顧炎武。華亭陸慶臻。上海蔡湘。翦燭賦詩。密誡司夜者促更籌。于子刻打五鼓。君起送客出郭。則守備姚順等已先受約。統步騎兵四百集南關外矣。疾行四十里。饗士卒于水泉灘。別爲三隊並進。入兩葫蘆川。據三坐崖。賊鳥獸散。散復合。且戰且奔。官軍分搜巢窟。先後獲魁渠二十二人。餘或降或自剄。君別淑慝。召山農終始不作賊者三十七家。賚以羊酒。其素不當夫徭者千四百三十家。編其籍入都圖。入山旬有六日。交山之寇悉平。君治交五載餘。修圖經。新橫舍。立倉廩。定軍營。折疑獄。罰贖錢。使種柳鑿山。通龍門渠。溉田十萬四千頃。又力請上官復南堡村木廠。秣善馬于驛。士飽馬肥。用降賊攻賊。故能成功。巡撫上其狀。徵入爲戶部山西司主事。居母憂。還籍。服除。補戶部河南司主事。載丁父憂。起復。補戶部四川司主事。十四年。覃恩由文林郎進奉直大夫。二十年。奉使徵揚州關鈔。君寬以惠商。負販乘舡。艤出入者。暨免譏察。輸稅者俾自封投櫃中。胥吏苛斂之弊盡革。復命監督通州中南倉。旋入會典館。奉勅排纂鹽漕二書。二十三年。誥授朝議大夫。明年。戶部尙書科爾坤上言。賦役徵解。條目太煩。請更造簡明全書。天子允其請。開局山西司。君充纂修官。時總裁光祿寺卿龔佳育持議。謂州縣催科歲發。由單分壤地之則。使民知輸納之數。法至善也。惟因畿輔撥補地畝。歲有更易。而江浙稅課。起運存留。條目繁瑣。近例有司必合計州縣之田。刊入由單。尾數稍有不符。動行駁改。名爲易知。在百姓實

難知。請米數止升合勺。銀數止分厘毫。自秒撮絲忽以下。悉刪除之。而升秒爲合。升絲爲毫。斯勘算易明。賦額仍無虧損。乃更定由單式。式未定。而佳育卒。計部在官人胥。動浮言以畸零數不可除。古未有議刪去者。朝士多惑其說。於是給事中楊周憲特疏請勿更。天子下公卿議。君作論一篇。援唐元稹當州所上狀中云。斛止于合。錢成于文。在百姓納數。元無所加。于官司簿書。永絕姦詐。是則昔人已昌言之。且米有圭粟粒黍。銀有微塵纖沙。入之權量。莫辨其形。鏤諸梨棗。徒繁其目。況會計凡析一爲三者。悉數之不能終窮。佳育議是。事雖不果行。盈庭莫能難也。又明年。天子需爭臣。試三十三人于保和殿。擢君戶科給事中。君上言。會典與紅本相表裏。故事。內外章奏。付內閣典籍廳儲藏。歲久無隙地。因貯科房。往往散佚。又各部司簿錄。有第載國書。未譯漢文者。除二十五年前。已經纂輯外。宜滿漢對譯。彙送內閣。以爲異日續修地。天子允行。旣而銜命勘河。還臺。班有與居忤者。劾君父子各占籍。以仕吏議落職。久之。補國子監學正。君好學。善與人交。夙有知人之鑒。分校山西鄉闈。拔馮給事雲驢。又賞識錢府尹晉錫。汪編修灝。于未遇時。每當賦詩酬和。袞袞不休。疊一韻至万首。所居寄園。考定爲月張園故址。濬池累石。分布亭館。種花木。海內名士入都。恆留連不忍去。君脫略禮數。過者不知何者是客也。所著書有續表忠紀。寄園寄所寄錄音韻正譌。徽州府交城縣志。詩彙尤多。俱鏤版行世。若交山平寇本末。則其友吳興夏駟紀其事爲一書。君年七十有九。終于京師。卒之歲。康熙四十五年二月。肫也。娶汪氏。誥封恭人。子三人。道歆。貢生。候選。

儒學教諭景從。山東布政司參議。分守濟寧道。景行。康熙丁卯舉人。內閣辦事中書舍人。女一人。嫁國子監生戴嘉猷。孫男一十二人。繼掄。歲貢生。繼朴。康熙己卯舉人。畢元。附學生。抗繼。撰國子監生。餘幼。未注士籍。女九人。曾孫四人。君之歸喪也。景從先卒。景行卜地于某原。葬有期矣。來請銘。嗚呼。君才傑也。宰百里之邑。積年未靖之寇。犯虎狼之穴。剗除之。其智勇有不可及者。而又詳于政典。使久居諫垣。言天下事。閭閻惻惻。何必不如古人。乃以微罪去位。一官左謫。徒令仰屋。梁著書以老。不亦可惜也夫。且徽州士族。多流寓四方。寄籍取科第。卽如先儒朱子。本婺源人。而紹興十八年同年小錄。注籍建州建陽縣羣玉鄉三桂里。彼夫城陽吳橫四子。吳守墳墓。吞居徐州。桂居幽州。快居華陽。前史不以爲非。由是推之。君之子。似乎可道。吏議也已。銘曰。

宰山城。枹鼓鳴。探赤丸。吏不驚。去劇賊。枹鼓息。陟考堂。譽超特。入諫垣。進讜言。嗟青蠅。止于樊。官雖左。賓滿坐。人裸裎。焉浼我。酒百船。詩千篇。留述作。通都傳。伊人逝。孰譚藝。音徽亡。哀輓繼。筮兆基。作銘詩。訂君實。無諛辭。

鄉貢進士魏君墓誌銘

君諱坤。字禹平。別字水村。世居嘉興之魏塘。今之嘉善縣也。曾祖考某。祖考某。考某。雖不仕。鄉黨稱善人。從祖吏科都給事中大中。忤奄寺。受蒙蔽。刑死詔獄。世父學淨。以哀毀。卒苦次。故言忠孝門者。首魏氏。君

十齡草今文。弱冠兼攻古文詩詞。家有田二十畝。不足供饘粥。父喪除。游京師。入太學。京師貴人延君授經教其子。既而客中吳。與嘉定陸徵君元輔。海寧陸處士嘉淑。訂忘年之款。詩詞日益工。尋就試橋門。撰石鼓賦。國子師交賞擊。以爲絕倫也。屢試有司不利。乃託迹賓幕。東游歷下。謁孔林。南入楚。粵西浮彭蠡。淹豫章。年五十有四。始舉鄉貢進士。兩與計吏偕赴禮部。仍下第。歲乙酉。復書驢券北上。以歲除前一日。抵真定之南關。寒甚。擁爐捉酒。乍飲三爵。聞一嗽。而君逝矣。太守寶應劉君中柱。君之故人也。哭君于簣下。質明。視其斂。合載以輻車。歸其喪。于是君之子錫琦。錫璉。將葬君于遷善鄉之東蚤圩。凶服來請銘。嗚呼。君之學。叩之而不窮。其修辭動中事會。所填樂章。被歌管。悉合于律。宜其有浙西才士之目。舉于鄉。謂晚且達矣。乃反速之死于道路。天乎人乎。若其持己正。臨財廉。非其道。一介不以入懷。非其人。近乎賦而不污。可謂有君子之守也已。君生于某年月日。卒于某年月日。享年六十。先娶陳氏。繼娶王氏。有子二人。孫男四人。女二人。所著有倚晴閣詩鈔。秦淮雜咏。歷山唱酬集。粵游記程詩。水村琴趣。多行于世。銘曰。魂兮歸來。北方不可以久留些。反葬于鄉。樂哉斯丘些。將詩可傳。抑又何求些。

歲貢生程君墓誌銘

歙縣程君諱浚。字葛人。一字肅菴。通經史百家之言。寄籍杭州。補仁和縣學官弟子。屢試不利。以歲貢入國子監。居歙之岑山。山形鐵峻。特立新安江中。爲一鄉屏障。君董工治樓榭。繚以垣牆。守望相助。草竊莫

敢窺。又新宗祠。以睦媿合族姓。通其有無。少出嗣世父。晨餐夕膳。事二人盡歡。且眷戀所生。終身孺慕。親亡。以兩房考妣合葬于一塋。築丙舍墓旁。歲時臚臘。禮拜上食。如生存。榜曰侍初堂。友愛昆弟。無間言。交友重然諾。不因燥濕輕重。能爲人釋紛。嘗陳亭戶疾苦于至尊前。顏色不少懼。里居逢寇警。率鄉勇防禦。寇退。官軍牧馬于郊。村民供芻。不繼。君言于主帥。旋師客安吉。茶陵兵變。有司苦無備。君從容代爲區畫。上官允其議。城得全。君歸理家務。然不廢學。兩淮都運司志。自徐鵬舉。朱廷立後。續者無人。君分門編輯。頗挈其要。暇輒治方藥。療有疾者。所活甚多。以是閭閻無貴賤咸稱君善人。君以明崇禎十一年十一月日生。卒于康熙四十三年十月日。享年六十有七。曾祖某。祖某。考某。本生考某。均不仕。娶吳氏。子四人。長喈。中康熙己丑進士。次啓。次哲。俱候選州同知。次鳴。國子監生。女一人。嫁國子監生汪琮。孫男八人。女六人。君既卒。歎諸生百二十有七人。合辭請以君入鄉賢祠。下上之論交孚。乃設粟主送入祠。將葬。君之季子鳴。請予銘其墓。銘曰。

不以爲人後而孝衰于親。不以身不仕而善諉諸人。庸言諄諄。庸德循循。祀瞽宗兮。疊序卜吉壤兮。桑津若稽古昔。庶追蹤于叔度元考之倫也乎。

嘉定張君墓誌銘

嘉定張雲章。既合葬考妣于先世之兆。率諸弟乞秀水朱彝尊銘其藏。雲章才士也。以貧游京師。適貴人

館。願得生稱弟子。不應歸謁節使。思強其在門。終不應也。以是屢試有司不利。歸愈貧。然其守已益嚴。義利之辨。動以古人爲師。自事親而外。孝養祖考妣。盡子職。蓋張氏世以孝友聞。由來遠矣。志之曰。君諱履素。字子旦。一字雯來。七齡喪母。父禔授以四子書。通一經。工楷書。弱冠補縣學生。奉繼母如母。友愛諸弟。田產僮僕。恆推與之。娶李孺人。武英殿中書舍人允新之女。嫻壺行。君喜得內助。晨羞夕膳。克承二人歡。魚菽之祭。歲時以禮。舍人嘗以珠二索計百顆遺君。大者重一銖。君初不審視。孺人亦不以耀首也。會君坐奏銷逋賦。尾數未輸。除名。悒鬱不自得。年四十四。病卒。孺人教諸子力學。躬治紡車。脩祀事。逾謹。曰。祭大事。吾家婦也。其可忽諸。賓客至。必供雞黍。舍人珠旣封完。屢空闔。以內無交譎語。雲章生時。孺人夢大星墜于懷。占者曰。後必顯。久而名不登仕籍。孺人安之曰。命也。君沒後。孺人力持門戶。四十餘年。以康熙四十六年。月日終。孺人有子五。雲章。雲蔚。國子監生。雲從。雲揚。縣學生。雲縉。業儒。女子一。贈孺人壻。內閣中書舍人朱文龍。孫男一十六人。女八人。曾孫女三人。銘曰。

歲貢生潘君墓誌銘

鄉貢進士烏程潘麟。舍舟謁予。蹲寶橋畔。請銘厥考之墓。問其門。世居縣之匯沮里。高祖可賢。奉政大夫。

知合州事。與兄太子少保工部尙書季馴同舉于鄉者也。曾祖某。祖某。考某。均不仕。問其出處。少補學官。弟子晚充歲貢生。職當授儒學訓導。未銓。問其年。生崇禎七年月日。卒于康熙四十三年月日。問其撰述。何書。則有易解。春秋傳考。家禮。小學外篇。天文星野辨。方輿曆法。錢法。鹽法。備荒法。諸書。律呂志。河渠考。花月田家曆。東齋隨筆。又以儀禮經傳通解。經朱子草創。未成足本。思取先後鄭氏。孔氏。賈氏。王氏。衛氏。敖氏諸家。會粹爲五禮。條目繁重。一手未果。論定也。富哉立言矣乎。今士習日下。由山長旣廢。司教者罕得其人。栗果少年。目不識九千字。擁臯比。秉木鐸。師嚴道尊之謂何。惜也。君之學術。經六藝。緯三才。未沾一命。以樂育多士。天實爲之。嗚呼。悲夫。君之學。一主乎敬。行事必告祠墓。與朋友交。長筵廣席。衆或讙。侍者見其以手畫膝作敬字。人或負已。無愠容。施于人。無德色。言必踐。善必躬行。嘗論學于家。其子問朱陸異同優劣。君曰。學者宜收拾身心。慎勿道聽塗說。業日修。得失自見。先儒優劣。辨之不差毫釐。與我何涉邪。其于門弟子請業。亦未嘗高談性命也。君年十二。開剃。令下髮落。輒以尺紙裹之。齒牙爪甲。謹藏之。笥。沒入周身之具。生平敦睦同氣。善難悉書。蓋潛德忽耀。幽宅不可無銘者已。銘曰。君之居。在苕霅。字東陽。諱開甲。讀父書。通六經。曲臺禮。尤研精。不矜名。不嗜利。孝于親。友昆弟。廣述作。何紛綸。去者疵。歸乎醇。銘君藏。列其目。俾名山。得著錄。君四子。長曰麟。叔也。天仲季存。君善人。宜有後。勒吾文。表耆舊。

徐州蕭縣儒學訓導樂君墓誌銘

維揚有嶽奇磊落之士樂君諱又令字允諧一字介冰少能文學使者試童子拔置府學名第一其爲人孝弟廣交友輕貨財闢菴圃京江中焦山障其下芰荷葭菼浦樹圍之數重有橘獨立結實青黃足當洞庭百頭暇招番禺屈大均賦詩宛平韓昌援琴鼓羽化之曲陶然樂其志也旣而海鯨深入戰後廢爲牧馬之場乃移居江都郭東八十里築洗心亭雜樹花柳比于故園風景略似乃講神仙服食之法成都費密爲作記君嘗一至京師以歲貢生入國子監選人按籍除君徐州蕭縣儒學訓導而君堅不赴也居家遂潔白之養父喪廬墓三年因徧覽青紫囊書兆基考宅家祭立宗子主之通族墳墓咸爲修治戚懿貧不能昏喪者必資以私錢胸無水旱燥濕鄉鄰鬪者以片言釋其爭蓋君之爲善不倦如此君以明崇禎十年月日生康熙四十五年月日卒享年七十配杜孺人子十人男四人長經內閣中書舍人先君卒次緯江都縣學生次統候選儒學教諭次大維揚州府學生女六人一適江都縣學生蔣畋一適揚州府學生陳琴一適國子監生高鼎蔚一適候選儒學訓導湯有娥一適江都杜德馨一適歲貢生郭元銳孫男十一人長宮聲揚州府學生承重服三年喪者也女九人曾孫男二人君晚自號悟賓道人擇地于攝山戴家庫題曰悟賓歸宿處戊子正月旣望井椁葬焉銘曰

舍儒官師老氏吁嗟樂君葬于此

文學鄭君壙誌銘

君諱珮。字原道。更字隨始。姓鄭氏。世居嘉興縣梅會里。里故無巨室。數門才者。曰西毛東鄭。鄭氏有鄉貢進士。知興國縣事。諱士奇者。君之父也。曾祖某。祖某。父某。三世均不求仕。君少治春秋。既而嫉胡安國傳義之非。投牒更治詩。家無田產。授生徒自給。所居破屋三間。垣牆不蔽。井闌竈觚。紡軛畢聚一室。客至呼主人。闔門而與之語。率以爲常。每文會賦詩。君堅坐不作。間擬樂府。音節出入漢晉間。一及諸經疑義。講說紛綸。闡前賢所未發。以是問業者漸多。束脩之入。積累十金。或勸君營什一之利。君乃畀里人褚已。浮舟于泖。販吉貝花。中塗爲盜所劫。已還語君。異日必償。君曰。盜劫子。吾責子償。是吾亦盜也。子勿復言。鄰有曹甲。貸君白金二鎰。賣藥于肆。以甘旨養其親。終歲子母不納。或諷君收其藥肆。君曰。甲藉是養其親。匪利我財。共子職也。封其肆。是奪之食。傷孝子之心。吾弗爲也。由是人皆目君長者。貴人延君訓其子。推大宅舍之。居數月。語人曰。華門圭竇。吾素安之。此非吾寢處地。竟辭歸。久之。家益貧。冬無衣。脚或不韞。然終不以告人。年七十有五。以疾終。娶崔氏。先卒。子三人。孫五人。貧不克葬。族人謀率私錢瘞君。乃書君言行納諸壙。系之銘曰。

子非墨氏之徒。而葬之薄也。猶勝僕而委諸壑也。嗚呼。斯命矣夫。

曝書亭集卷第七十八

墓誌銘五

中憲大夫知思州府事陸公墓誌銘

去平湖縣治東六里五行涇有丘隆然爲故中憲大夫知思州府事陸公之墓。公諱世楷，字英一，別字孝山。曾祖考長庚，中萬曆八年進士，累官南京通政司使，進兵部右侍郎。祖考啓鱗，國子監生，以孫萊貴，贈通議大夫，內閣學士，兼禮部侍郎。考濬容，宣府推官，始封內弘文院中書舍人，累贈通議大夫，內閣學士，兼禮部侍郎。妣譚氏，山東布政司參政贈太僕寺卿昌言之女，累贈淑人。公少補學官弟子，有文譽。順治五年，以選貢生赴吏部，除平陽府通判，又四年，同知登州府，又六年，遷知南雄府事。後十九年，丁父憂，服除，補思州知府。蓋先後視府事二十四年，未得遷，告歸。四年卒，卒時年六十有五。公之判平陽也，甫至而姜瓖搆亂，遠近蠢起，應之。平陽被圍，守以下局縮不能畫一策，公貸粟于富民，籍其丁壯，登陴固守，百日而圍解，旋誘降其魁渠，釋其黨師。後大饑，人相食，公爲粥食，餓夫馬周于郊市，辨民色，先後給之，餓者全活。其在登州，海寇揚帆猝至，將逼城下，公立設守具，率舟師禦之，寇乃逸去。時叛帥海時行剽剗州縣，僭稱王，以公知兵事，戒勿犯境，又登有嫠婦，夜爲盜所殺，鄰里訐其媳有所私，慮事露，殺姑滅口，公攝縣事。

察其寃。求殺人者不得。禱于城隍神。夢一馬騰蹕不休。晨徧呼死者戚懿。嫠婦有姊子爲驛卒。公疑焉。訊之。卒言殺人夜投牒入府。公念投牒時日。有文簿可稽。取驗之。字屬改竄。卒乃引服。蓋卒初意行竊。方入門。嫠婦突出。猝加刃焉。媳實不知也。南雄嶺嶠門戶。疆理初定。平南靖南兩藩王並駐廣州。羽檄不絕于道。部將更替出嶺。一日。篋死七人。公馳見帥。論軍士罪。有戴孔雀翎者二人。入始興山。自稱平藩侍衛。發民鑿礦。民盡恐。公往詰曰。王雖尊。不得擅役吾民。今不使太守知。詐也。遂縛二人送廣州。王不敢問。黠僧與平藩暱。結精廬。府郭外。誘婦女入。鎖其夫後圃。而媵其妻。閉置者十餘。公詢知之。僧故拳勇。手一楮。百夫莫敢近。乃詭言營齋。延之至。入門。門焉者根闔。及堂階。則胥隸畢集。縛之。以前僧瞋目呼無罪。公先時已別遣捕卒。盡執僧廬所藏婦女至庭下。僧辭窮。公斃之杖下。邦人皆以爲快。嶺南俗好訟。公曲喻以理。赴愬者漸息。暇築天峯書院。課諸生。溫鏐王灑等講學。買田以饒之。去之日。老穉拒輪遮馬。不得行。立祠。府治東。士民春秋社祭。其莅思州。值王師凱旋。軍馬絛釋。府舊設平溪清浪二衛。後劃歸胡廣。而站夫猶循例派協。公請于上官。得免。繼遭旱祲。斗米二千錢。吏請開徵秋稅。公不可。民德之。輸者過半。前守以增賦得遷。公覆丈以弓。無餘壤。請反其舊。又持議謂思州雖列爲府。所屬止四土司。居民附郭。不滿百家。丁糧不及一小縣。而又商旅不通。營伍不設。供億難與他府齊。宜仿黔西平遠近制。降爲州。隸之鎮遠。而以施溪一土司割附銅仁。可救一方之困。議未允。公乃以病引歸矣。公孝事父母。友愛諸弟。篤友誼。能通財。

不以生死爲厚薄。家無美田宅。遇人有緩急必應。未嘗責報。歸田後。足跡不詣公府。有司行鄉飲酒禮。請公爲賓。辭者三。然後赴。晚結方外社。與禪人通復。今釋。縱譚清淨理。通復工于詩。今釋者。前進士仁和金堡也。公守南雄日。爲治丹霞精舍以居。公歸後。舍之于東園。遂終老焉。公于詩歸風合雅。不墮叫囂之習。文格醇正。手輯南雄思州二志。事必徵信。集若干卷。存于家。公生某年月日。卒于某年月日。配張恭人。生某年月日。卒于某年月日。合葬于墓。子男八人。咸有文行。一嗣仲父某也。女五人。俱嫁士族。孫男九人。女二人。銘曰。

嗚呼。古之循吏。久于其官。政以不煩。民以不冤。公于黔于粵。除惡必先。濟之用寬。客至張廬。廬旅居船。士也。討論。席研壺餐。志其山川。申畫土田。有德有言。溢于炎塵。宜爾子孫。克昌厥文。美哉鮮原。秀木丸丸。罔有後艱。

許封君墓誌銘

晨有造吾門剝啄者。童子以告。眎其刺。則給事中山陽許君也。延之入。布衣菅屨。請以弟子禮見。主人固辭。稽顙而後言曰。志進不幸。連遭父母之喪。鮮民之生。分不如死。茲日月有期。將葬。惟先生之文無諛辭。庶取信後世。敢請銘。按狀。公諱某。字信孚。其先自吳徙于淮。世居山陽縣之東村。曾祖歲貢生某。祖鄉飲賓某。考督師參佐某。公讀書通大義。不就試。居父喪。自初終及葬。一準于禮。母病。視藥餌。惟謹。祭必致齋。

家法嚴肅。不飲酒。不圍碁。無嬉戲之具。教諸子以義方。少不當意。輒施夏楚。性質直負氣。不肯下人。恆慷慨自許。曰。人生不行萬里。豪氣何由得伸。乃南浮江漢。北走燕齊。西逾河洛。歸治菑圃。將老焉。旣而就給事君。鐵嶺官舍。因東涉遼海。視其子。行取入京師。補戶部主事。改授兵科給事中。旋掌禮科給事中。印加五級。公初授封文林郎。進封朝議大夫。配周氏。慈惠有壺儀。初封孺人。進封恭人。子男三。長給事君。志進也。次某。次某。俱國子監生。女三。俱配士族。孫男三。女五。尙幼。公及恭人之還里也。給事君方擬奉潔白之養。而恭人以康熙四十四年五月先卒。公旋以四十五年正月病終。宜給事君之躄踊號泣。深以不幸自傷也。以予論之。士惟貧賤得顧父母之養。然無升斗之祿。糠粃不飽。雖欲啜菽飲水。盡其歡難矣。若一登仕籍。官守言責。拘繫不得自由。聞親喪。逾時奔者有焉。不得奔者有焉。彼夫墨衰經以治兵。奪情而秉國政。豈其初心不作孝哉。殆亦時勢迫之。貪位之念旣萌。立身一敗。遂不可以爲人子。今給事君以言去國。眷戀庭闈。朝餐夕膳。病奉藥裹。喪視斂含。凡附于身。周于棺槨者。無不致其誠信。勿之有悔焉。而且吏不呼其門。朝不釋其服。孝子慎終之禮。斯可勿憾。毋亦不幸之幸也。與。銘曰。

淮之水。悠悠得地而流。有崇者丘。是爲太岳之裔。給事中之考妣。合葬于是。幸哉有子。

知交城縣事靳君墓誌銘

君諱治青。字東表。先世自歷城徙遼陽。曾祖某。贈光祿寺。祖某。贈通政。考弼。通議大夫。兵部職方司。

郎中君其第三子也。年十三喪父。習舉子業。服除。試不售。補筆帖式。以贍敏稱。出知太原府。交城縣事。交故巖邑。號難治。君至。興教化。勤撫綏。開誠布惠。民乃胥悅。歲乙亥。平陽地震。人死者萬計。君奉調勘災。掩骼賑飢。殫竭心力。會禁旅北征。道出雲朔。奉軍符協辦糧草。鄰縣率多浮派。君獨斟量緩急。極意節省。民無重困。又踰沙漠。送戰馬至大青山。不敢告勞。無何。郡檄下。督責文書過當。君素寬和。及是忿甚。因得心疾。不復出廳事。然庶務能舉。大綱無關冗者。閱三年。乃請歸。歸六年。遭母崔淑人喪。疾益甚。又踰年。遂卒。予昔游太原。嘗一至交城矣。縹馬城隅。登萬卦山。日暮風雨作。遂留宿僧舍。夜聞擊柝雜魚板聲。山僧竟夕不寐。晨起。鋪眉苦眼。有憂色。詢之。山去縣西北五里。逼寇穴窟穴。其徒慮驚客也。其後錢唐趙君吉士宰是縣。請于上官。調兵勦平之。然遺種尙未盡。及君爲政。幾于臥理。而在交九年。邑無桴鼓之警。民樂其業。以是信君之才爲不可及已。君嘗依其兄養疴官舍。暇探四明三衢山水之勝。間賦近體詩小詞。清疎秀逸。頗入作者家數。惜乎短折。未克升堂入室也。君生于康熙己酉十月二十五日。歿于乙酉十一月十三日。子寶齡尙幼。經紀君之喪。而合葬。君夫婦于某原者。君之仲兄寧波府同知治荆也。銘曰。一朝之忿。疾不可醫。胡才人之不達。而命止于斯。吾銘幽宅。太息齋咨。矧伊兄弟。奚其不悲。

儒學訓導倪君墓誌銘

同里倪君。識之四十年。君時授徒城東竹亭橋。卽其人。恂恂有君子之容。觀其文。悉本經義。君早見知于有司。九試場屋不利。年四十八。以歲貢入國子監。諸城李侍讀澄中。讀其廷試卷。亟薦之。榜發。以儒學訓導待銓。是秋。赴順天鄉試。復不遇。君乃焚所作詩文。就予宣南坊邸舍。講經義。學爲古文辭。其說經不專主宋儒。謂易有君子之道四。不當專主爲卜筮之書。又謂尙書古文可疑。武成紀日。與召誥。顧命異。益可疑。又謂孔子說詩。蔽以一言。曰思無邪。淫奔者豈暇作詩。而孔子取之。當依小序爲是。又謂大小戴同授禮。不當偏廢大戴氏。宜去月令。存夏小正。去明堂位。存明堂。投壺。則參用之。又謂說春秋者紛綸。皆害于義。孫復。胡安國。刻深尤甚。又謂羣經縱有錯簡。宜仍其舊。宋元諸儒。多逞臆見。更易。未免侮聖人之言。其持論頗與予合。因留不去。取韓嬰。鄭康成以下詩說五十家。折衷而抄撮之。旣而予移家具寓宣北坊。轉徙斜街花市。君授經宣武門內。弟子著錄者日衆。乃避跡西山。君精于易卜。斷卦奇中。又善青黃紫囊之術。撥沙發水。偶爲主人相度。聞者造請日繁。君曰。吾術期避禍爾。諸公欲以化者要福。不可得也。先是有例。選人入貲者得先除。君念親老。思謀三簠以養。東脩之入。悉輸之官。名當注除目矣。或索其籍歷數歲。名反居後。遂引歸。歸事其父。飯糲焚枯。怡然樂也。逾年。痛其弟天無子。遂成痼疾。歲在丙子。筮之。得乾之同人。曰。此六月之卦也。吾其以是月終乎。壬辰。果卒。年六十有一。君諱我端。字郢客。初名野王。字古期。先世嘉靖中。自紹興避倭亂。徙嘉興。曾祖文遇。國子監生。仕爲廉州府經歷。祖某。早卒。祖母胡。持苦節。授

君毛詩孝經者也。父某不仕。母張氏。妻吳氏。子二人。仁存。國子監生。鳳喈。海鹽儒學生。女一人。壻國子監生沈某。孫一人。女孫一人。君事祖母。父母孝。友于諸弟。無間言。又急人之難。故人有孤。不負其託。平居義命自安。客或憫其不遇。秋試以關節進。拒不受。又臨財廉。口不言利。婦翁念其貧。贈以負郭田六十畝。君固辭。翁沒。亟還外家券。人有所負。不責償。其人內媿。久而獨完其逋。或以計中君。君亦未嘗宿怨。其學以正心術爲本。博通經史。尤邃于詩。橐雖未就。言詩者莫有過焉。間與浮屠道士還往。然臨終誠其子不得作佛事。其持正若是。嗚呼。今之爲校官者。許以貲進。黃口白面後生。目未覩九經之文。擁臯比自詡師表者。不可悉數。以君之學。俾登講席。庶幾合乎古之書院山長。足爲士子圭臬。而卒不得試所長。老于逢掖。死不亦可惜也。夫于其葬。宜有銘。銘曰。

文林郎知舒城縣事朱君墓誌銘

里有同進士出身。知廬州舒城縣事朱君諱振。字嗣宣。一字千仞。所居州東灣。在清香樓左。蓋府治卽秀州治。故名。君孝父母。友愛諸弟。睦族人。以兄事予。其論學以主敬爲本。文尙體要。去枝葉。歲乙卯。受知崑山徐公秉義舉鄉試第三人。己未。試禮部。釋褐于太學。丁卯。籤除今官。戊辰冬十月。覃恩授文林郎。壬申六月。卒于官。舒城自崇禎壬午遭寇亂。井邑丘墟。入皇朝。雖加意安集。然居民多鴈戶。遇歲凶。輟耕而走。

催科不前。又路處劇驂。送迎官長。鮮暇日。俗好鬪。士多廢學。君至。首葺明倫堂。月課士子。以經書義。均賦稅。清保甲。勸農桑。息爭訟。凡害于民者。次第去之。莅官之明年。武昌兵變。王師有征。由舒入楚。民大恐。市肆皆閉。君曰。師行糧食。絕其食。是導之掠也。令大開縣門。悉民間市肆所有物。徙置兩廡。君立堂下。俾胥史輿隸。操斤權。具斗斛。束芻菱。洗盆甕。君平物價。而鬻之。兵獲醉飽。歌舞而去。先是上官欲調江寧兵。戍英霍府。檄下。俾封桃溪。運米船以載。典史請任其役。君曰。無庸。舒非必由之道也。既而府檄復下。令釋所封船。人乃服。君善料事。縣多槁壤。水利久廢不治。舊有七門三堰十塘。漢韻羹侯信始造。至魏。揚州刺史劉馥修復之。溉田二萬畝。迄于明。知縣事。范得民。劉顯。更事修築。民共其利。後爲勢家曲防。遏之。使不下。君循覽故蹟。毅然以疏濬爲己任。諏日鳩工。畚鍤聿興。克復其舊。舒民布穀。旣穫。赤白相雜。計部以所輸米色不純。行令赤白分貯。山農苦于分揀。君力請漕督。援河南事例。免分貯。其言曰。身爲親民之吏。而民隱不知。罪已不勝誅矣。若知而隱忍。是視一己之功名爲重。而萬民之怨罵爲輕。義之所不敢出也。漕督嘉其強項。允咨計部焉。君治舒五年。盡心民事。不遑暇日。以勞遘疾。終于官舍。囊無長物。舒人祀之名宦祠。且率私錢。設祭道左。執紼泣下者千人。旣歸喪。以康熙四十二年十月。葬于嘉興縣北辰字圩祖塋之左。於是鄉之父老子弟。謂君循吏。宜配食鄉賢之列。衆皆曰。可有司得請。乃造粟主送鬻宮。君之曾祖某。祖某。俱不仕。父某。敕封文林郎。舉鄉飲大賓。年九十而卒。母張氏。贈孺人。繼母艾氏。封孺人。妻凌氏。亦

封孺人。子三。德溥。嘉興縣學生。修永。益求。俱國子監生。女二。一嫁王上舍藩。一嫁吳上舍瓚。孫男二人。尙本。向東。女二人。嗚呼。今之號稱能吏者。吸民膏髓。以善事上官。得拔擢入臺省部曹。比比也。若君之宰邑。目不知有上官。第以勤民爲先務。或惜君脆促。未盡其才。然使再假之年。彊直自遂。難乎免于上官所劾。是則君年之不永。獲全其名。未可謂君之不幸也已。曩者君謁選人于京師。就予舍館。相與論古今得失。聞予一善言。喜動于色。有過未嘗不相規也。蓋知君之詳者。莫予若。德溥兄弟。請誌君墓。遂不復辭。銘曰。悅以使民。民功曰庸。胡不報最。而遽凶終。邑有俎豆。里配馨宗。君可勿憾。反葬家江。

文學管君墓誌銘

管氏之望出太原。又出彭城。其自陝西三原遷于宣州。則宋靖康間諱某始也。自宣城遷懷寧。則明洪武初諱某始也。君諱某。曾祖曰某。有隱德。祖某。嘉靖癸酉舉人。知金谿縣事。考某。縣學生員。君年十八。補學官弟子。以文試有司。輒置高等。名籍甚。于時貴池吳應箕。次尾宣城管質無疑。交譽君。延之入復社。復社者。東南知名士。相結持清議。拒闖人黨。與東林卿大夫聲氣相附和者也。應箕實爲倫魁。君辭不可。謂必有鉤黨之禍。未幾。果然。福王南渡。馬士英。阮大鍼柄用。濫以名器假人。江東諺曰。職方賤如狗。都督滿街走。而大鍼之母。君之姑也。一日。君往省焉。大鍼留之邸。謂曰。弟欲官乎。君不應。曰。道匪遠也。池州太平。需同知府事。督餉數月。可遷爾。君以不習吏事辭。遂亟引去。大鍼既死。平生藉其勢者。或竄匿。或縲縶繫之。

或遇于道。至唾其面。而君獨以遠權力。一無與焉。人曰。咎君可謂皎皎素絲。涅而不緇者已。君性孝友。六齡繼母王撻之。無完膚。幾絕。婢奔告其父。父大憾。君曰。母撻兒。教兒也。家人聞之。盡流涕。及父卒。執喪盡禮。讓產及其弟。鄰里匱乏。有昏喪。必助之。君始居懷寧縣北荻坂。廬舍爲寇所焚。乃徙桐城。棕川之梅渚。晚結茅杏花村。策之得坤之萃。曰。括囊无咎。无譽。因自號晚訥。書其壁曰。飽吾嬉焉爾。臥吾寧焉爾。醉吾陶陶焉爾。又曰。惟慎無憂。惟忍無辱。惟靜長安。惟儉長足。君子學博綜經史。旁及醫藥。卜算之書。老而愛釋典。恆語其子曰。吾前身恍忽在深山草閣中。積雪千丈。有龐眉叟行送別。執手不能舍。來自雪中。吾生矣。吾沒之日。亦必以雪夜。及臥疾。天大雪。擁被起曰。吾其逝乎。遂卒。君妻阮氏。曾祖鶚。巡撫浙江都察院。右都御史。祖以臨。欽州知州。考士鐸。銓授府推官。歲乙酉。叛卒屠城。阮氏遇賊。以刃脅之。不從。身被重創。猶罵賊。幸不死。享年七十。乃卒。子男二人。茹芝。茹穎。女二人。孫男三人。女六人。曾孫女一人。銘曰。適來雪也。適去亦雪也。夫子之潔也。琢銘幽宮。永勿涅也。

文學曹君墓誌銘

君姓曹氏。諱山秀。字中峽。嘉興人。祖父皆不仕。君幼習詩。補縣學生員。歲乙酉。嘉興城破。予年十七。依外父馮君。避地練浦塘東。君世居幽浜。予兄事之。有吳君莖者。人目爲狂生。家橫涇水曲。相去各二里。而近中道。爲五兒子橋。三人者。暇輒相訪。糲飯一盂。肉一杓。酒一注。留必醉飽。日將暮。悵悵不忍別。及橋徘徊。

橋上縱論天下事。有不合。吳君瞋目視大譁。唾及人面。橋畔叢祠有病僧。聞之駭。蹣跚出。窺戶牖。則見笑啞啞不止。疑始釋也。既而予同君讀書烏木橋村。賦詩日酬和。君有詩曰。魯連思蹈海。申徒欲沉河。猗嗟古之人。不爲世俗阿。俄而盜劫主人居。君有弟從學。善泗水。盜至。遂投河。君亦亟投河。沉浮于水者數。其弟竟死。而君不善泗水。反得不死。鄉人以爲詩讖。君痛弟。故自是不復作詩。專治舉子業。弟子從之游者。漸衆。館真如僧舍。僧寂月。通儒書。能詩。予每皆吳君造。君則寂月亦至。劇談移日不去。夜坐彌勒龕。琉璃燈下。恆達旦不寐。寂月語人曰。與諸君譚。假令載筆記之。卽法言中說也。聞者怪之。不顧。予旣客游四方。久之。吳君亦入楚。轉客于黔。以卒。未幾。寂月亦逝。君十赴省試。不利。乃附載運船。訪予京師。會予奉命主江南鄉試。君至。則大困。旅食淨度寺。著散懷錄。自遣。比予還。則君已病。遂不起。予往視其斂。兄子某扶其柩還。半塗亦沒淹。數月始達于里。子某葬之。先世之原。君娶某氏。繼娶卜氏。卒時年六十。嗚呼。方予與君田居。往還晨夕者。寥寥數子。相見肝膽畢露。妄謂天下無不可交之人。無不可言之言。其後朋游日廣。夷憚怨隙。皆非吾意所期。始信久要之難。悔少日之失。而轉惜舊友之亡。爲可痛也。銘曰。

生吾以爲兄。死吾與爲銘。人不如故。先民豈欺我哉。

張君墓銘

南徐之州斗分野。大江浮浮繞城下。吁嗟張君老環堵。易緯蒼牙詩媿雅。曉吟午誦夜膏火。稽之于古關

學舍包咸章昭庶其亞。身雖不遇行則果。貽厥子孫三獨坐。施于有政無不可。譬諸江流千里寫。發源自岷者君也。有崇斯丘神所妥。斧屋旣封樹枌檟。納銘于幽告來者。

高士李君塔銘

高士李君者。自上海來平湖。割西宮道士之樓居焉。以醫藥自給。年七十病卒。君先世曰尙袞。曰中立。皆舉進士尙袞未授官。中立爲大理寺右評事。又有立武功與倭戰沒者。建祠南匯城。代爲士族。而與君游者。多不知其門閥。年二十間道走桂林。名書仕版。而與君游者。終不知其官資。君娶伍氏。再娶殷氏。鞠氏。先後生子九人。悉天。而羣從皆學官弟子。與君游者。或不知其有家室子姓。於醫受業于季父中梓。士材中梓撰方書一十七部。君補撰藥品化義醫學口訣脈訣彙辨痘疹全書四部。刊行之。有延之治疾者。數百里必往視。疾愈不責報。或酬以金。輒從。西吳書估舟中買書。不論美好。由是積書三十櫝。繞臥榻折旋。皆書也。與居游者。相對樓下。不知其儲書之富。客過無分出處貴賤。怡顏相接。暇則坐輕舟。載花郭外。藝庭前。飲客酒。必自遠致。山肴海錯。饌必豐。與君游者。不知庖爨何地。而君意所嚮何者。爲疎密也。歲在丁丑。冬十有一月。予至平湖。則君已疾革。視之。猶披衣起坐。出所著□□□□。南吳舊話錄。暨所撰詩古文。曰放鷗亭集。并以付予。且命弟子以所儲書二千五百卷畀焉。其餘散去。平居玩好。一瓢。一笠。一琴。一硯。悉分贈友朋。越二日終。遺命弟子。用浮屠法。盛尸于龕。焚其骨。瘞之塔。後二年。訪君葬所。則近在東湖。

之漬。其友江某。實治其藏焉。弟子蔣某。徐某。請予銘。以垂之永久。銘曰。
君諱彥貞。厥字我生。後更延昆。古文夏字。爰遁于野。改字辰山。亦曰寒村。被道士服。栖琳觀之側。汎汎松舟。而
泝而游。疾者熏灌。或以解散。有花有苗。有甲有條。步欄兮逍遙。有經有子。有文有史。搖筆兮伸紙。有肴有
脍。有藪有魚。留客兮康娛。嗟君之窀窆兮。忽自逃于釋兮。嗟君之去故都兮。委恆幹于東湖兮。或疑羽流。
或謂僧伽。視我銘辭。其高士邪。

曝書亭集卷第七十九

墓誌銘六

烈婦楊氏墓誌銘

華亭之鄉。伍胥浦之右。有水曰璜溪。陳氏世居其上。烈婦楊氏者。儒學生諱某之子。給事中諱某之孫。嫁陳某。生三子。一女。歲在乙酉八月。松江城破。游卒乘勝至璜溪。執陳某。斧傷其首。烈婦奔救其夫。卒舍某。執婦。某得脫。婦給卒曰。毋縛我。我走及汝。卒信之。比登舟。遽躍入溪中死。時年三十有一。陳氏之僕。有妻曰張惜。匿葭葦中。見婦死狀。兵退。其長子曰治。年十二。號于溪畔。越二日。婦尸浮溪而得。就斂。當是時。游卒大掠溪上。一婦投溪之東。曰徽州商人孫氏之媪。一婦投溪之西。曰儒學生孫諤妻顧氏。三人皆完節死烈。婦幼能讀毛詩。孝經。列女傳。平居訓子女不輟。舍傍有梅三十本。皆其手植。蓋至今存也。治好學。多材藝。游于京師。以醫自給。將歸葬其母。乞其友秀水朱彝尊爲銘。銘曰。

溪之水。沄沄若斧者。墳於戲女子。而烈如是。旣活其夫。乃捐其軀。有子也賢。壺行斯傳。我銘于石。南史是擇。

蔣孺人墓誌銘

康熙二十有三年彝尊謫官居京師之宣南坊武進龔勝玉持束紡升堂再拜請銘其祖妣蔣孺人之墓彝尊老矣而文不加進恆自惡許之而未果作也後三年勝玉復謁予宣北坊固以請乃取其季父燾所爲行狀誌之曰

孺人姓蔣氏先世侯爵也自宜興徙府城曰某曾祖考也曰某江西吉安府通判祖考也曰某國子監生考也年二十三歸龔某事孀姑以孝姑歿哭盡哀上膳繆幕無異事生者其持家以儉蒿簪布裙躬自操作相夫子三十年生產日益既遭亂率其子士樞匿深村葭葦中士樞中溼疾殞叔子士黠亦殤越三年而寡孺人少知書能讀孝經列女傳教其子若孫讀書歲時臚臘修祀事惟謹門以內肅然睦于娣妯族人喪葬輒以錢資之有貸者靡勿與與不責其必償也孺人年七十季子士燕以治曆官欽天監歷科博士假歸於是五子及婦十孫咸奉觴爲壽鄰里以爲榮既而士燕又死歲在己未孺人亦以疾卒享年七十有七子男八人女一人孫男若干人女若干人曾孫男若干人女若干人勝玉好學有文以國子監生知名一時昔河東柳宗元于其母盧叔妣陸伯祖妣李皆不外求而爲之誌勝玉宜古是師顧數請于予予則烏能詳孺人之壺行也系之以銘銘曰

杞也妣宋也子楚也芊蔣諸姬文公裔封通侯陽羨里後徙郡世廡仕孺人賢爲龔婦孝厥姑配嘉耦訓子孫勤莫比善必昌自今始蓼莪山樹枌梓井同穴葬于是勒吾銘庶垂久

朱孺人墓誌銘

先太傅文恪公有女二人。其一作配臨安縣儒學教諭平湖陸君淪原。彝尊之王姑也。生子埜。以能詩聞于時。女嫁劉炳圖。文恪公子女中。孺人最少。年十四。嬪于陸氏。族黨交稱其賢。敬以事姑。謙以接娣。儉以自處。家人外。內忘其爲宰輔臣女也。孺人生于萬曆三十八年正月日。歿于崇禎十六年十一月日。年三十四。卒之日。一女甫嫁。子猶未婚也。陸君悼孺人不已。遂不復娶。獨居四十年。及卒。有孫四人。曾孫男女七人。於是埜。昇孺人之柩。祔葬于東湖之鱗圩。屬彝尊爲銘。彝尊生時。先太傅已卒。是時曾祖王母何太夫人尙存。孺人歲歸寧者再。伯叔舅弟姊妹羅拜于堂。猶記孺人貌言必莊。行坐皆有矩度。今老矣。回首少日事若夢寐。先人北門之宅。曩之聚族居者。已不可問。及孺人之葬北門。羣從少長。零落殆半。銘其墓。不禁涕泗之下也。銘曰。

嚴孺人墓誌銘

常熟隱湖之濱。隱君子毛翁居焉。其繼室曰嚴孺人。孺人者。明光祿大夫。太子太保。吏部尙書。武英殿大

學士贈少保諡文靖諱訥之曾孫隆慶丁卯鄉貢進士承廕中書舍人諱治之孫國子監生諱枬之女年二十有三嬪于毛氏孺人生長高族既嫁卻綺紈金翠之飾簪蒿裙布甘與翁偕隱翁先有母戈甫昏疾篤孺人居姑喪所以致其孝者無不盡也翁先有一子三女孺人撫之若己出所以用其慈者無不周也翁于家祭折衷司馬氏書儀朱子家禮行之孺人潔治錡釜所以將其敬者無不專也翁從游錢尙書謙益之門勤學嗜古博覽典籍謂經術必本漢唐庶窮源得以津逮乃于崇禎元年開梨棗之局發雕經十三史十七于所居汲古閣下時諸務未中條理明年孺人來主中饋分命僉僕各執其役讎勘之賓剗劂之工裝潢熟紙之匠各從其宜秩然有序則孺人內助之力居多自元典章用宋熙寧經義取士所主傳注率本淳熙諸儒明因之經生立異義者黜又以灑埽應對進退易古小學其後書數方名均置不講而識文字者寡矣挾三家村夫子兔園冊足以取高第糜好爵而有餘無事洽聞周見也翁深憂之力搜祕冊經史而外百家九流下至傳奇小說廣爲鏤板由是毛氏鏤本走天下翁既沒孺人持門戶又二十一年其季子屨精小學傳寫諸家金石書畫記及古五曹九章算經思盡刊刻以行可謂善述先人之事者已翁初名鳳苞字子晉後更名晉別字潛在天啓崇禎間屢試于鄉不利兵後遂高蹈不出有子五孺人出者四曰褒曰衰曰表存者屨也孫二十人曾孫二十三人翁之葬也錢尙書銘其藏矣今以孺人祔屨率其諸兄之子來請銘銘曰

裴宗五眷。李族三祖。志尙詩書。相門之女。河間汲郡。抱經以傳。隱君嘉耦。其功媿焉。同穴旣封。考宅永久。我作斯銘。竊附蒙叟。

王淑人墓誌銘

淑人諱克榮。姓王氏。順天宛平人。今保和殿大學士太子太傅兼禮部尙書加三級熙之女。光祿大夫太子太保禮部尙書諡文貞諱崇簡之孫。布政司使贈太子太保禮部尙書諱愛之曾孫。太子少保吏部左侍郎山陰胡公諱兆龍之子婦。河南提刑按察司使介祉之配也。世祖章皇帝時。王公胡公並以翰苑受知。備顧問。侍左右。兩公交好。日篤。同居禁近。無間言。旣而胡公沒。遺產甚薄。公配劉夫人。鞠育三歲。孤比長。延經師教之學。脩脯必豐。又睦于懿親。日費恆誦。持門戶甚力。王公每歎其賢。曰。吾當以女爲之婦。於是淑人年十五。歸于按察君。事姑惟謹。不以生長富貴自矜也。君旣通籍。爲工部營繕司員外郎。遷兵部車駕司郎中。以清白自勵。俸入苦不支。淑人拆花鈿易米。鬻嫁具于市。不少靳。及出爲湖廣按察司僉事。督理驛鹽事務。會王師平雲南凱旋。檣櫓轅馬。絡繹于楚。君治公務。不遑啓居。淑人事其姑彌謹。明年。君移官山東布政司參議。督漕運。駐德州。未行。而淑人卒。卒後遇覃恩。誥贈恭人。進贈淑人。生于順治十七年十月甲寅。沒于康熙二十二年七月辛巳。年僅二十有三。淑人產五女。其三天。謂按察君曰。姑老矣。宜亟見孫。爲置妾媵二人。視之若姊妹然。及淑人沒。舉子三人。女四人。嗚呼。婦德之難也。貴則凌長。才則嫉

下蓋往往然矣。淑人孝事其姑，順事夫子，而仁以逮下，可不謂賢乎？且匪獨淑人之賢，亦以見王公門內之訓之嚴，交友之厚，而按察君伉儷之重。自淑人沒後，十年不更娶，皆人之所難能也。已銘曰：以淑人之德，曾不永年，迴鸞有紙，賁于下泉，伐石于燕，奪玉之白，刻我銘詩，可永無泐。

孫恭人墓誌銘

戶部廣西清吏司員外郎休寧程君岳，造予旅館，奉幣稽首而曰：曩者屯溪石橋之建，先生記之以文，道先君子爲德于鄉里甚備，今不幸先恭人喪，將合葬于某原，卜兆有日，冀先生一言掩諸幽，敢以請，予不敢辭，迺按狀誌之曰：

恭人姓孫氏，世居縣之西山，父處士某，有五女，不生男子，恭人最少，嬾內則，處士憐之，及笄，歸程翁子謙，翁遠服賈，貿遷滌泗潁毫諸州，恭人居事舅姑，盡力潔盤餐，而能飭躬以儉，暇課臧僕種紫瓜白苧蔬，果繞牆屋，夜督奴婢篝火治機綾，以爲常，惟教二子，厚脩脯，延名師講經義，每放假，叩以所學，則色喜，謀于夫子，置祭田，春秋聯其宗族，又念所生之不祀也，別爲祠屋，立粟主，俾二子陳俎豆拜焉，調戚懿之窮者，賻鄰里鄉黨之死喪者，至率水之隄，屯溪之石梁，動費金錢累萬，恭人悉勸翁成之，蓋翁固樂善不倦，亦由恭人傾箱篋不少靳，蓋所見者遠，而所施者弘矣，今世祿之家，夫不以智率，婦不以義從，往往爲之婦者，輒制其夫，夫亦甘受制而不知恥，卽爲善之念，油然而根於心，而管鑰恆司於內，雖銖兩之需，不謀諸

婦不可得。由是失其初心者不少也。惟浮屠道士營造。動以禍福惑愚婦人。則施予者有焉。以予聞恭人臨沒。誡其子勿作佛事。嗚呼。恭人孜孜爲善若是。特不惑于二氏。此士君子所難能也已。恭人生于明崇禎元年月日。卒以康熙四十二年月日。享年七十有六。以覃恩誥封子二人。長卽員外。君次崙。內閣中書舍人。出嗣世父後。女三人。均嫁士族。孫男五人。女一人。曾孫男一人。銘曰。德積于身。寧責報于子孫。然不爽者天。徵信者文。吾銘其藏。豈惟以貽程氏之後昆。

馮媪冢銘

嘉興縣治東南三十里。曰練浦。浦之東民居。曰馮村。村之女有終身不嫁。年六十七以死者。曰馮媪。媪之兄。歸安縣儒學教諭馮君也。葬媪于君之宅西二十步。而誌之以文者。君女婿朱彝尊。方媪年少。父母欲嫁之。媪之言曰。吾好直言而貌樸。好直言必獲罪翁姑。貌樸則不禮于壻。嫁焉。未有不困者也。吾從兄嫂以居。而送父母老。何以嫁爲。馮君憫其言。不復強也。媪之父母旣沒。食于其兄者四十年。君旣就官。乃依予妻以居。抱予子女甚謹。予游嶺南歲丁酉正月。媪以疾卒。予妻視其殮殯焉。予哀媪無祀。爰封以土。銘其藏。在某年月日。嗟夫。婦人之義。從一而終。嫁而寡。守貞宜也。其或未嫁而夫死。雖未從之。以身守其言。不改其節。蓋世之所難能。故或旌其門。或表其閭。則猶有名焉。若媪之貞。無得而名焉者也。予嘗疑媪迷惑佛氏之言。詢之馮君暨予妻。則媪生平未嘗事佛。異哉。媪之所以自處也。銘曰。

猗女子之不字。無非無儀。瘞汝銘汝。夫又奚嗟。

葉嫗冢銘

葉嫗者。乳子于襁褓者也。予生四齡。嫗歸。歸九年。浙東西大旱。飛蝗蔽天。歲饑。人相食。而嫗之夫適死。因就食予家。予家自先太傅文恪公以宰輔歸里。家無儲粟。先大父繼之。益以廉節自礪。知楚雄府事。還力不能具舟楫。至是先大父已卒。先處士安度先生家。計愈窘。嘗至絕食。從祖諱大定。通判成都。以蜀江米四斛貽處士。米色殷而糲。食之咽喉若中魚骨。嫗不得飽。乃流涕辭去。十年之中。凡五嫁。而夫輒貧。嘗語人曰。安得十郎驟富。使我老不復更嫁乎。其言可憫如是。十郎謂予也。嫗年七十有一而死。死之日。後夫益貧。予妻爲典衣買棺以殮。越明年戊申。予在濟南。聞而哀之。資其夫錢若干。俾往瘞焉。寄之以銘曰。婦人五嫁。理則不可。貧實驅之。否誰依者。傷哉貧乎。乃至辱其身乎。

曝書亭集卷第八十

行狀

徵士李君行狀

曾祖考應徵。國子監博士。祖考士標。寧海州同知。贈尙寶司丞。考寅。國子監生。君諱良年。字武曾。初名法遠。又名兆潢。年三十。乃更焉。先世江陰人。明洪武初。提舉行千四者。徙居嘉興長水上梅會里。七傳至博士。中萬曆元年。舉人。有詩名。著澄遠堂彙稿。司丞繼之。有蒼雪齋集。當同知寧海州事。值冷口兵入。圍城。固守三月。以勞卒。而城陷。巡撫右僉都御史會化龍。上其事。得贈官。君之考上舍。以結客破家。饋粥恆不給。然必延師教諸子。妣顧孺人。佐之。脯脩獨豐。故君之兄弟。咸奮志于學。君九齡。能草時文。十齡。解賦詩。既而上舍客死韶州。家產益落。鬻其故居。兄弟並棲小屋。君又喪偶。就族人爲童子師。予方避地長水。偕里人詩篇酬和。處士屠爨謂予曰。子之才。里中罕儷。吾門有李生。將來庶幾與子並駕乎。予遂與君定交。晝輒劇譚。夜或襍被共寢。四方賓客至。則釀錢留飲。相與論詩文流別。議有不合。難答紛綸。聽四坐折衷。而後已。君既再娶。始有居一廛。集同里詩人。聯句樓上。君兄繩遠。弟符與焉。江鄉言詩者。目爲三李。時商丘侯方域。南昌王猷定。皆以所撰詩文鏤版于浙。君覽之。終卷曰。是不難。遂期予共作古文。沿流溯源論。

行狀

次之。於詩持格律甚嚴。嘗抄撮詩中禁字一卷。授學詩者。繼乃舍初盛。取中晚唐。及宋元諸集。別出機杼。鏘洋淡沓。極唱歎之致。於詞不喜北宋。愛姜堯章。吳君特諸家。故所作特穎異。予游京師。轉客太原。後二年。君亦至都下。無所遇。留宣府。予從逆旅見君。期之復入都。偕游西山。題詩于壁。傳抄者不絕。一時朝士爭欲識吾兩人。每召客。客輒詢坐中有朱李否。合肥龔端毅公鼎孳。爲文酒之會。延知名士三十餘人。君以墮馬後至。燭見跋矣。必俟君至。乃舉爵。宛平孫侍郎承澤。謝客著書。特與君爲忘年友。長洲汪編修琬。爲文高自矜詡。獨傾心下君。沛縣閻舉人爾梅。論詩斷斷。惟與君相洽。君方欲羅當代之文。甄綜爲一集。曰文緯。人咸冀君之錄其文也。故縞紵之投恆倍。又持論和婉。多可少怪。善言作者之心思。故人皆樂就君論說。永年申檢討涵昉。常語人曰。聞朱十論詩文。使人心慴。未若李十九之可親也。於時曹侍郎申吉。出撫貴州。引君爲助。旣聞三藩同撤。君曰。亂將作矣。遂力辭歸。爲母壽。旣抵家。雲貴告變。歲戊午。天子思得博學文儒。備顧問。著作之選。君被薦入京師。己未三月朔。召試體仁閣下。賜大官饌。高坐而讌。申以詔旨。謂文武科進士殿試。未有此典也。君讌畢。纒纒千言。賦詩皆極瑰麗。閣臣以八十卷進呈。顧君不與焉。君旣不得意。有鳳陽守延君。君與偕。守重君。自畫諾外。悉以委君。君留久之。歸築秋錦山房于漾葭灣。其南曰觀樞。枿曰剩舫。北曰息游草堂。坐臥其中。弟子著錄者日衆。君精心計。其築草堂也。構楹柱枅。瓴甃之屬。一經鳩度。立匠人坊者于前。分授之。斧斤旣施。不爽尺寸。至于相原田。治耕稼。藝蔬果。雖農圃恆歎。

以爲不及也。其後兩至福州。贊巡撫軍事。尋以崑山徐尙書乾學開書局于洞庭山。君應其招。助修一統志。自是歸不復出。予旣罷官。與君往還。投壺飲酒。無異少壯時。今年五月。君病疴。旣痊矣。復病。竟沉。縣不起。享年六十。初娶錢氏。兵科給事中桐鄉諱允鯨之孫。生員汝邁之女。繼娶陸氏。子一人。潮偕。國子監生。孫男三人。菊房。萸房。蓉房。君所著有秋錦山房集若干卷。嗚呼。自君以薦入。不登朝簿。同時無不惋惜。雖然。才也者。衆人所嫉。當日與君並薦。稍以才自振。若宜與陳維崧。富平李因篤。上元倪粲。仁和吳任臣。宣城高詠。旣登用矣。皆未遷一階以沒。以君之才。使入仕籍。安知不有忌者。而君得優游幕府。偃息于田里。菽水足以養親。大小之山。上下之涸。足以樂兄弟。詩書足以教子孫。耕桑足以課童僕。則天之所以予君者。不爲不厚。彼一命之榮。要不足爲君重也。竊意君雖未仕。他時國史傳文苑。宜及焉。乃因潮偕之請。書其平生大槩以爲狀。俾後之君子有所考。

國子監生錢君行狀

國子生錢君旣卒。其子炆。衰絰稽顙。請予作狀。予與君居同里。君之舅譚給事瑄。陸閣學棗。予中表兄弟也。炆又從予游。講經學。習聞君門世。及君行己本末。義無可辭。狀曰。君諱樵。初字又鶴。世居海鹽半邏村。本姓何氏。始祖某。于洪武中坐事戎黔。屬其次子某。于錢翁。遂更錢氏。五世祖薇。中嘉靖壬辰進士。官禮科給事中。以星變陳言。請斥方士。忤旨免歸。講甘泉湛氏之學。卒贈太常卿。高祖與映。嘉靖甲子順天舉

人曾祖周內閣辦事中書祖嘉徵以諸生入貢留京師值莊烈愍皇帝初踐位是時魏忠賢方怙勢人莫敢言嘉徵首上疏劾忠賢滔天十罪直聲動一時久之除知松溪縣事還卒于僧舍考泮崇禎丙子舉人妣譚氏山東布政司參政贈太僕寺卿昌言之孫官生貞和之子君生十齡而孤居喪如成人克盡禮服除兵起城遭屠乃奉母村居而君之祖留松溪唐藩建國擢監察御史時七閩未入版圖諜報有司奉臺檄捕家口繫君獄中祖還始得釋旋補學官弟子授弟楨以書或勸君入國子監試京闈君乃一至都念母譚孺人不已卽引歸鹽豉菽水盡潔白之養有餘周其族鄰買田以供舅家墓祭俄弟楨歿以所愛子燔爲後及弟婦遺腹生男君殫心撫育之居母喪尤盡孝葺治先世丙舍手植松楸嘗稻麥果窳必薦新于祠屋至于私錢出入無錙釐妄費審緩急後先以分薄厚不嗇不濫人咸服君治家之有法而予嘗遇君子舅氏所劇譚古今事君世受尙書能辨析今文古文中文之別而兼通周官禮經國理才之方吾鄉自明宣德四年析嘉興縣地立秀水嘉善二縣其時祇依戶籍爲憑不以疆界分畫故三縣之田互嵌民相安者二百餘年迨萬曆十三年嘉善之民忽以糧額不均起訟於是三縣爭許紛綸不已蓋至今猶然江浙賦夙重吳俗相傳明太祖惡張士誠拒守故重斂其民畝稅有輸官七斗餘者君所論辨其非是謂禍始于賈似道經界推排之役當日原有官田民田官田輸租民田輸稅其後知府事趙瀛取而均攤之嘉興官田不及二千頃而民田五千八百餘頃故其賦最輕嘉善民田止三千一百餘頃而官田二千七

百餘頃。故其賦于三縣中。差重輕。重由官民田數不均。非因嵌田之故。著論萬言。推衍事始。更端詰難。其言旨悉與予合。予益信君學術之有本也。君娶陸氏。繼娶吳氏。子男六人。女一人。孫男七人。女十人。嗚呼。今之治舉子業者。局守宋儒之訓注。百翻兔園之冊。足以取科第而有餘。問以鄉曲之利弊。茫然如坐雲霧。其與斯世何裨焉。君能繼其家學。彊直自遂。又以餘力考稽財賦鹽筴之源。犁然有會于心。發爲論辨。無異建始文學御史之議。惜乎不用于時。終老牖下。人亦罕有知者。此予因怆之請。傷君之亡。不可以不述也。謹狀。

亡妻馮孺人行述

孺人姓馮氏。諱福貞。字海媛。世居嘉興練浦之陽。考諱鎮鼎。歸安縣儒學教諭。妣胡孺人。生母沈氏。教諭君爲學官。弟子有名。交漸廣。乃徙居府治之北。再徙碧漪坊。去先太傅文恪公第近止百步。教諭君年過四十無子。生孺人。特珍愛之。五齡延塾師陳翁。授毛詩孝經。有費姥者。往來教諭君家。見孺人聰慧。爲先妣唐孺人述之。唐孺人屬姥爲妣。是夕。教諭君夢文恪公衣袞造其門。遂以孺人許彞尊爲配。寒家自文恪公以宰輔歸里。墓田外無半畝之產。祖考忱予公。知楚雄府事還。僅敝衣一篋而已。至本生考安度先生。家計愈窘。歲饑恆乏食。行媒旣通。力不能納幣。彞尊年十七。爲贅壻于馮氏之宅。遭亂。兩家各去。其居唐孺人病終丙舍。安度先生攜兩弟播遷塘橋之北。生祖妣蔡孺人又歿。先生益窮苦。彞尊旣昏。孺人贊

予往侍養。教諭君以田二十畝持券付孺人。孺人語予曰：割父之田以奉翁，非力養矣。辭不受。挈其女至塘橋，鬻所有金條脫，治饔膳。爲兩弟補紉衣履，隘不能容。遂賃梅里道南茅亭之居。迎先生至里，繼又移居。接連之橋，予授徒不給。遂南渡嶺，越二載歸。則孺人徙西河村舍。是冬，復還梅里。所居屋人傳多鬼物，目爲凶宅。孺人不少懼。每晦夜，滿屋梁皆白光，牆下鷄囁囁有聲。女巫來言，發之常得金。孺人謝曰：吾夫家累世顯官，可以不貧。今貧若此，天也，非所得而得之。天其殃之矣。蓋居是宅十一年，未嘗萌一念及室中之藏焉。教諭君卒于歸安官舍。孺人聞訃，攜子昆田及老嫗二人，見星而奔。是時新塍以西盜賊充斥，舟子咸股栗。孺人拊心號哭至哀。羣盜舟泊岸，相顧不忍肆劫。予年二十，卽以詩古文辭見知于江左之耆儒遺老。時方結文社，興詛誓，樹同異。予槩謝不與。而四方知名士往來于禾者，輒造梅里。孺人治酒肴必豐。雖夜分區畫立辦。賓客過者，談讌極歡。或淹留旬日方去。花鈿無多，盡付質庫。晝夜紡績以贖。客至，復質。如是以爲常。交謫之言，初不聞于柵內也。歲癸卯，予客永嘉。其冬，安度先生病革，將無斗儲。孺人邀予姊妹同視湯藥。予歸未旬日，而安度先生棄世。孺人哀毀，治喪事靡不中禮。旣而予游大同，轉客太原。入于京師，復留濟南。孺人力持門戶。歲時臠臘，修祀事惟謹。延經師于家，誨昆田，必具酒肉，操作愈勤。夜率二女治機綉不輟。坐昆田于紡車之旁，執卷于燈背，令就火光課晝所讀書。必成誦乃已。給紙筆使臨摹法帖。凡昆田交游至，或有燕朋雜于坐。孺人必嚴誡勿與交。越五年，予歸里，爲昆田婚。買宅于鄰。宅西

有竹曰竹垞。謀葬安度先生唐孺人于長水之東。將井椁矣。葬師僉言不利主婦。謂改歲乃可。孺人語予曰。姑之柩留丙舍二十餘年。翁亦六年矣。此而不葬。葬何時乎。禍吾當之。勿悔也。乃克葬。彝尊以序當後。晦在公。孺人事公。無以異于事安度先生也。歲在乙卯。公歿于項氏寡姊之室。孺人往治喪。成禮。宗鄰稱其賢。孺人既嫁二女。教其孫及外孫。一如教子法。己未。予以薦召試體仁閣下。授翰林院檢討。纂修明史。辛酉。充日講官。知起居注。是年主江南鄉試。雲南平。覃恩封孺人。賚贈唐孺人。壬戌。挈孺人入都。癸亥。予入直南書房。賜居黃瓦門之東。甲子元日。彝尊方侍宴。天子念講官家居室。特賜肴果二席。孺人九拜受之。洵異數也。是月予被劾謫官。三月。移寓武門外。孺人尋病。病愈。以秋八月。浮舟潞河還。語予曰。君恩重。夫子且留。毋悻悻去。自是予留京師。既補官。孺人聞之。乃復由江淮北上。抵泊頭。運河水合。孺人中寒而病。扶入車。既至。病漸痊。壬申正月。予復罷官。三月。解維張灣。津路濳紆。以五月次東昌。則分水牕已閉。舟車酷暑。孺人病又作。比旋里。爲長孫完娶。時生母沈先已病歿。家人祕不言。孺人詢知之。大慟。病復發。饘粥不進。其後時止時作。猶強起櫛沐。理家務。迨冬十一月。馮村族人以教諭君墓木且伐來告。孺人心悸。意謂未然。既而果遭伐。孺人悲憤。病愈劇。蓋自是臥不能起。醫藥不能療。及臨歿時。語不及家事。惟執昆田手曰。汝幼時。汝父遠客。我教汝讀書。冀汝上進。今汝七試。而名不成。我又不能待命也。夫語訖。昆田方哀號。而孺人逝矣。孺人生于明崇禎四年九月廿一日未時。卒于康熙三十三年二月十四日卯時。

享年六十有四子一人昆田禮部注籍監生娶沈氏女二人一嫁吳江周能察一嫁桐鄉儒學生員錢琰又從弟彝性沒二女無所歸孺人撫爲己女一攜至京師嫁國子監生秀水徐雍一嫁吳江貢生吳南齡孫二人桂孫稻孫孺人歸予將五十年少日遭亂恆與予夜避叢篁密篠中流離顛躋凡徙宅者十一始克寧居爲兩叔一子四女一孫昏嫁治兩翁及母胡喪備諸辛苦又津塗往來莫或遑處蓋終身憂患未嘗一日自安平居慈愛肯周人之急所至鄰里咸懿無不歡洽雖漁娃竈妾食必推與之以是孺人之歿聞者無不歎息嗚呼悲夫謹撫其遺行以告立言之君子

誄

故都察院右副都御史總督浙閩軍務朱公誄

嗚呼。邾婁之後。望沛及吳。其在于齊。東郡是居。枝分葉布。本一根株。公之哲舅。讜言無隱。撫浙制畿。中法而殞。紀于太常。易名惟允。公也繼起。早歌鹿鳴。牽絲作宰。視草爲郎。黃圖樹屏。儷于薇堂。天子是葵。殊渥超拜。紅繡碧幢。填撫嶺外。入奏嘉謨。出承大賚。公旣蒞止。綱舉目治。薄賦惠商。吏畏民懷。人不敢者。公乃有爲。盜先殺人。後收貨賄。舊染汚俗。積不能改。公捕獲之。悉沉諸海。江則有沱。船則有戈。商行千里。劃槩而歌。頌公之德。久而不磨。旣遷于閩。治與粵僭。閩兵易譁。教之以整。閩俗易囂。鎮之以靜。公于仕己。喜愠不形。扁舟歸第。對客一枰。宣勞河曲。疾疾乃嬰。公疎禮法。胥無水旱。廚傳雖盈。濁醪糲飯。不知公者。謂公

爲媪公率寮屬見必分曹肺腑之語辭不在多不知公者謂公爲驕公今逝矣還喪歷下我瞻大東老成
徂謝舍彼華堂銜悲長夜公之清忠當代共知吾思他日國史紀之無徵不信視此誄辭

哀辭

沈武功哀辭

歲在己酉冬予將往濟南友人沈武功送予落帆亭畔越二年歸里武功偕予登胥山賦聯句詩未幾別
去予留江都武功寄予書將葬其父處士君世涵具狀來請銘銘未就鄉人自南來則武功以正月癸丑
死矣武功幼遭亂失學九齡始自讀書日記誦萬言長工于詩性恬澹不樂仕進居父喪盡禮事母至孝
卒時年三十沈氏自南京大理寺卿玄華以廉慎聞其子文琦博洽負時譽人謂必相繼取科名卒不遇
再傳至處士君省試將見錄矣復擯而武功亦困窮死嗚呼生才實難顧武功以上世多文采疑天于沈
氏獨厚然皆終其身不得志以死至死且天此人事之最悲者爰爲辭以哀之武功諱傳弓秀水人辭曰
處賤以爲榮遇不詭也豐實而藏華行勿毀也孰是人斯壽止此也妻亡矣遺其穉女親老矣鞠及童孫
菽水伊何況甘旨也嗟行之人悲未已也矧在同游識君久也嗚呼欲銘其父而先哭其子也

祭文

弔李陵文并序

朱子登乎采掠之巔。覽大漠之野。見有雪山。峙乎西北。若出若沒。若廬若旅。回睇從者。忽失其處。從者曰。是所謂天山也。李陵之臺在焉。朱子曰。噫嘻。有是哉。竊嘗論陵本文士。顧以家世爲將。欲立功殊域。方其召見武臺。恥隸貳師軍。請得步卒五千。自當一隊。其才誠有過人者。及兵盡矢窮。以身降敵。短衣椎結。對蘇武泣下沾襟。抑何陋也。其身辱名隕。亦足爲負才喜功者之戒。然陵方降敵。隴西士大夫咸以爲媿。而司馬遷猶力爭以爲國士。雖大節如武。終不以衛律遇之。交好尤篤。則其情有可矜者也。河梁之詩。爲五言所自始。使得一鳴饒歌郊祀之盛。庶幾史克正考父之美。復見于漢。乃委之漠北。幸而武奉使倡和之詩。得復流傳于世。迨武旣歸。其悲惋無聊之思。必有甚于平昔者。登臺而望。豈乏感時懷友之作。惜乎不傳者蓋已多矣。自古愛才之主。宜莫如漢武。然其所好。特司馬相如靡曼之詞。枚臯東方朔俳諧之體。以遷之文。陵與武之詩。獨未聞有稱焉。至柏梁旣成。賦詩高會。當極一世之選。乃所與賡歌颺言。則衛青輩一二麤豪武人。及大官上林丞。刀筆俗吏八九而已。此何爲者邪。賈生之才。文帝不善用之。爲世所惜。若武帝之于陵。用違其才。殆又甚焉。嗚呼。才士之不遇于世。自古然矣。爰命從者。酌之以酒。而爲文弔之。其辭曰。

入雲中而四望兮。路百折以登危。眄絕漠之驚塵兮。悼失身于篤期。嗟平城之搆患兮。三十萬其莫支。曾不念祖父之數奇兮。不大賢于武臺。以五千當萬騎兮。固宜心一而不離。何女子載于行間兮。將在軍而

莫知儒生不可使卽戎兮。妒人不可與謀。無援師以委敵兮。何百口之足讎。死旣媿成安兮。生復慚乎泥野。憾因杼之妄言兮。遂投杆于謀者。前奚侯使上坐兮。後丁靈之嘲我。殺身旣難能兮。寧歸國之不可。斧冰以爲繡兮。續帶以繩。瞻畢昂于南街兮。望天漢之東傾。朝忽忽其就暮兮。夜迢迢而獨興。雖永絕于君親兮。尙見思于友朋。刀環旣違願兮。何故鄉之足慕。驅囊駝于鼈牛兮。獵霜禽與秋兔。登荒臺之負絕兮。送故人于長路。舞短服于樽前兮。聽悲歌其如訴。身雖陷沙漠兮。盟未忘乎曹柯。歎形迹之長乖兮。豈忠信之可訛。居殊域而心故都兮。夫孰明子之無他。彼河梁之高倡兮。麗五字而爲詩。感杜甫之遺言兮。謂二子其吾師。斯人不可作兮。大雅其衰。才士自古而失職兮。奚吾生之足悲。

告江神文

年月日具。官某謹以剛鬣柔毛。香帛之儀。致祭于大江之神曰。某欽承上命。主試江南。自誓此心。澄同江水。惟神昭察。濟以安瀾。如其寸衷有味。徇人賄託。廢棄真才。神靈有知。允當罰殛。復命渡江。甘葬魚復。以爲後鑒。謹告。

貢院誓神文

年月日具。官某等敢告于天地神祇先師孔子之前曰。某備官禁近。皇上拔於衆中。俾典試事。主恩深重。惟有同事一心。攬真才以佐盛治。命下之日。師友親懿。一概屏絕。今入棘闈。用白于神。如或心存曖昧。遏

抑真才。狗一人之情。而受一言之賄。託通一字之關節。神奪其算。鬼褫其魄。五刑備其體。三木囊其頭。刀斧分其尸。烏鳶攫其肉。矢言之出。百神共聞。謹告。

祭孫侍郎文

公之歷仕。記則有史。公之生平。藏則有銘。我姑略焉。詳公交情。往歲丁未。我未公覲。公獲我詩。賓座賞擊。庚戌八月。謁公之堂。我祛公攬。偕步于廊。款語未已。旋羅酒漿。自是過從。月必三四。公召我趨。我歸公至。嗟世論交。不樂草茅。雖在丘園。以位自高。誰肯忘年。攜謙用勞。公以先覺。自稱同學。題扁見貽。竹垞之楣。我歸二載。公顏未改。仰屋著書。一本程朱。河淮之議。水田之利。舍彼薦紳。芻蕘是詢。公學不泛。考古能鑒。示寶琰玉。僉目爲劍。尊曰不然。作釋圭一篇。公書報我。謂云可傳。歲且更始。祠考亭夫子。執檉視壺。廢徹而舖。公言子去。歲必來助。我考之喪。見星而奔。公命哲嗣。馳賻國門。書言臥疴。未克躬唁。期子重來。慮不爾見。我時臨發。對書載眺。朔南攸隔。歲月其愴。既達于京。公果逝矣。不覩公容。覩公孫子。回憶公言。聲悲益吞。僅一人知己。而又不存。觴酒在筵。挺燭在几。我涕有盡。我哀何底。

祭納蘭侍衛文

嗚呼。往歲癸丑。我客潞河。君年最少。登進士科。伐木求友。心期切磋。投我素書。懿好寔多。改歲月正。積雪初霽。紉履布衣。訪君子第。君情歡劇。款以酒劑。命我題扇。炙硯而睇。是時多暇。暇輟填詞。我按樂章。綴以

歌詩。翦綃補衲。他人則嗤。君爲絕倒。百過誦之。迨我通籍。簪筆朶殿。君侍羽林。鮫函雉扇。或從豫遊。或陪
曲宴。雖則同朝。無幾相見。我官旣謫。我性轉迂。老雪添鬢。新霜在鬢。君見而愕。謂我太臞。執手相勗。易憂
以愉。言不在多。感心傾耳。自我交君。今逾一紀。領契披衿。敷文析理。若苔在岑。若蘭在沚。君於儒術。餽學
博通。文詠書法。靡有不工。康里嚶嚶。李虬魯狃。暨薩都刺。未知孰雄。君之勇略。侍帝左右。騎則籟雲。射必
穿柳。出師絕漠。不憚虎口。乃眷帝心。倚毗良厚。當其奮武。不知善文。及爲文辭。不知能軍。允矣君子。才實
逸羣。隨陸絳灌。異於前聞。和氣婉容。承顏以孝。友于昆弟。古昔是傲。謙謙者守。溫溫者貌。逆之勿恚。順之
無傲。花間草堂。淥水之亭。有文有史。有圖有經。炎炎者進。或鍵而扃。縫掖之來。君眼則青。浮醪于觚。盛倉
以筆。夜合惺忪。花散籤帙。聯吟比調。曾未旬日。詩朋尙在。忽焉輟瑟。彝尊月朔。謂君尙生。問疾而止。入巷
心忤。復者在屋。升自東榮。魂招不來。躑躅屏營。寢門旣哭。容車將騁。大泉一枚。蠟燭一挺。侑以荒辭。泣下
如綆。靈兮有知。痛無不省。嗚呼尙饗。

祭劉太夫人文

嗚呼太君。其德斯柔。色斯愉也。孝以爲婦。而順以承夫也。以嚴則母。慈則姑也。卑尊長幼。咸克有孚也。樂
善之勤。靡終初也。相少保公之起家縣令。而躋尙書也。太君子時。挽鹿車也。千里之行。奉板輿也。在汾之
陽。在浚之都也。錦軍之城。白門之廡。往必俱也。總師于邊。贊中樞也。耆德旣隆。壺範益據也。九伐司馬。五

教司徒也。三典司寇。進三孤也。綸翟之榮。錦韜象軸。賁于閭也。公沙六龍。皆民譽也。其三同懷。二入翰苑。女封夫人。則鳳雛也。孫曾則百。誅誅揖揖。螽斯如也。爰自侍郎公之填撫。竟青徐也。河山十二。極海隅也。沉寃之獄。減其辜也。敝勅之民。緩其逋也。災傷之地。蠲其租也。賑者累萬。必及其孥也。是乃奉太君之教。以成公之訏謨也。蓋太君之仁。匪特下及家人子姓而已。凡賓客之至。問所須也。及饌遺所無也。貸者無不輸也。惠心淑問。難悉敷也。嗚呼太君。貴矣富矣。昌矣大矣。壽矣康矣。榮矣哀矣。稽之于古。殆莫之與符也。某等從侍郎公游歷下。獲拜太君子堂。而忽聞長逝。誠不禁涕泗之霑裾也。牲之羶也。酒之醺也。盤有果而俎有脍也。踞陳于筵几之前。念德容之如昨。而不可覩矣。爲文告哀。冀靈之式鑒。而享此肴蔬也。

祭黃母周孺人文

嗚呼孺人。嫁不必鄉里。寓公是歸。產不必多男。有子而才。常其相夫子而仕也。六館四門。教胄子也。監丞之賢。孺人爲之耦也。及其殞所天而孀也。慈闈之訓。兼義方也。徵君之賢。孺人成其名也。嗟世營營。聲利是求。維孺人之德。安貧勿憂。餐以菽水。不事鼎飪。服以縞綈。不事玉錦。古聖微言。載在六經。有圖有史。百氏縱橫。香廚祕閣。易散難并。監丞耽讀。廣爲探纂。徵君益之。凡八萬卷。朝哦夜誦。孺人佐之。機絞之聲。徹于書帷。歲著雍敦。艸閨月修。痾。我辭白門。言歸柴辟。徵君邂逅。周在浚之宅。時鶴書初下。有司敦迫。人爲君喜。君蹙其額。匪榮名是逃。念母氏兮劬勞。商秋乃發。達于燕郊。陳情之語。僅徹東曹。哀訃忽至。杖桐而

號見星斯奔。過市則哭。觀者道旁。屏營躑躅。矧在彝尊。猶子情親。帷堂未拜。瀆酒遙陳。臨風涕泗。媿告哀之不文。嗚呼尙饗。

曝書亭集附錄

葉兒樂府

折桂令正宮

鬧紅塵。袞袞公侯。白璧黃金。肥馬輕裘。蟻陣蜂衙。鼠肝蟲臂。蝸角蠅頭。神仙侶。淮王雞狗。衣冠隊。楚國獼猴。歸去來休。選个溪亭。作伴沙鷗。

又

故鄉人。千里書投。漁弟樵兄。盼我回舟。老僕長鬚。侍兒赤脚。穉子蓬頭。趁新雨。過時插柳。揀綠陰。深處騎牛。歸去來休。二頃秫田。一簣糟丘。

又

挂輕帆。潞水春流。夾路煙花。直下揚州。第二泉邊。第三船裏。第四橋頭。喚十五女青蛾。對酒點兩三條紅蠟。藏鈞。歸去來休。老子尊前。最愛歌喉。

又

近南湖。結个書樓。橋影前溪。塔火中流。梅蕊衝寒。荷香銷夏。楓葉鳴秋。松樹底。一壺村酒。柳陰中。幾隻漁

舟歸去來休。典我春衣。日日郊游。

又

問先生老矣何求。一片西山。幾載勾留。獻賦長楊。挂冠神武。捐珮瀛洲。也曾簪筆。踰螭坳。右手也曾移家。住。鼇禁東頭。歸去來休。閒把君恩說與朋游。

天淨沙

一行白鴈清秋。數聲漁笛。幾點昏鴉。斷柳夕陽時候。曝衣人在高樓。

水仙子雙調

昏鐘百八戍樓敲。旅夢三千鄉路饒。平頭六十今年老。算不如歸去好。得逍遙。且自逍遙。閒摘朶山花簪帽。緊隨身。村沽滿瓢。醉拖條竹杖過橋。

又

半湖山上采樵夫。百步橋邊垂釣徒。三家村裏耕田父。這生涯。都不苦。要歸與。只便歸與。錦屏風。蒼厓紅樹。白雪灘。金盞玉鱸。綠楊灣。赤米青菰。

又爲毛大可輓姬人曼殊豐臺花匠女也

玉堂傳說小名兒。檀板能歌絕妙詞。銀鈎會寫相思字。記人扶。拜客時。勝豐臺一捻花枝。留客住。豪端染

紙想夫憐。箏柱調絲。今日箇長恨題詩。

沉醉東風

香茅屋。青楓樹底。小蓬門。紅板橋西。雖無蔗芋田。也有桑麻地。野薔薇。結箇籬籬。更添種山茶。綠萼梅。這便是先生錦里。

又題周編修漁隱圖

檝頭船。茶壚酒盞。藕苗衣。筍笠筠竿。撈鰕柳樹陰。放鴨蘆花岸。畫圖中。儘自消閒。縱使君恩未許還。終不學鋪眉苦眼。

清江引

西風古寺攀楊柳。落日低銜岫。山行萬里程。水次雙江口。鴈兒不來魚定有。

普天樂中呂

小樓前。疎林外。艾基丹井。顧況書臺。灣灣綠水深。點點青山矮。釣侶詩朋看都在。把封泥酒甕齊開。雞頭竹胎。穀芽餅燄。油菜花臺。

又

到清秋。開家宴。生魚切玉。野雀披緜。村村斲蟹肥。日日湖菱賤。對竹千竿書千卷。悶來時。划箇花船。白蓮

寺前青陽橋外金粟山邊。

朝天子送分虎南還

驢車慢些小住長亭者疎林不隔遠山遮。幾點新黃葉。雲脚天斜。鴈書橫寫。趁歸人南去也。離別漫嗟。只可惜中秋月。

又

魚標稻苗爭似南湖好。月寒沙柳夜蕭蕭。帆影卸。三姑廟。暗水橫橋。矮屋香茅。看黃花都放了。絲繡布袍。再不想長安道。

又送融谷宰來賓

箏絃酒船且緩坐紅亭。勸仙鳧。飛度鷓鴣天。種柳濱江縣。木樨花邊。柑子堂前。算輕郵道六千。涼煙暮蟬。話十里河橋遠。

又

花時荔支日日堆江市。石牙山翠雨絲絲。榕葉交廳事。萬里相思。六六魚兒。盼雙雙。新燕子。清詩小詞。帶幾箇平安字。

詞作

錢唐洪昇叻思

鸚鵡鳴。啼徧桃榔樹。鬱金香。散雨如酥。村社敲銅鼓。退食公餘。岸幘升車。向青山。閒弔古。男巫女巫。醉酒拜劉因戶。

前題

秀水徐善敬可

梧邊柳邊。飛不到。衡陽雁。牂牁江上。伏波船。遙把才人餞。桂葉青圓。蕉實黃鮮。荔支林。紅萬點。葛仙鮑。仙天付與。丹砂縣。

前題

錢唐龔翔麟衛園

雷江瘴鄉。到日官梅放。訟庭無事。畫簾張。沉水煙初颺。醒酒茴香。消食檳榔。緩平湖。菱芡想。琴堂笛牀。咏不了。蠻花樣。

落梅風查山探梅

十里青苔路。三更翠羽啼。泛輕船。太湖邊。檣等南枝北枝花。放齊也未。必明朝風起。

又

細細香苞綻。泠泠淺水流。趁快雪乍晴時候。把短簫橫笛催上樓。對七十二峯行酒。

金字經憶辰姪作

蝴蝶難分隊。鴛鴦擬作雙。行近秋花六扇牕。剛迴身。避乳獠。新霜降。紅葉溼鞵幫。

又

碧浪湖邊樹。白蘋江上舟。風雨蕭蕭不耐秋。愁歸帆。郭外抽。從別後。無計再勾留。

山坡羊 雙林菴

涼雲池面殘陽臺殿。綠槐不吐青蟲線。開河淺。寺門偏。蹇驢斜背風中絳。可惜馬蹄歸路遠。船橋那邊。蓮紅一翦。

又 飲池上

昏鴉初定。涼蟬都靜。絲絲魚尾殘霞剩。渚煙冷。露華凝。香簫笑卷青荷柄。我醉欲眠君又醒。箏簾內。燈花外影。

醉太平

野狐涎笑口。蜜蜂尾甜頭。人生何苦鬪機謀。得抽身便抽。散文章。敵不過時髦手。鈍舌根。念不出摩登咒。窮骨相。封不到富民侯。老先生去休。

一半兒 西溪 商調

滿林殘雪碧山坳。人日春風金剪刀。孤棹野塘紅板橋。玉梅梢。一半兒開遲。一半兒早。

又 靈隱

冷泉亭子面山崖。蕭九娘家沽酒牌。壚畔碧桃花亂開。到重來。一半兒依然。一半兒改。又淨慈

冷雲山寺畫屏秋。斷塔雷封殘照留。孤汶酒村風幔收。載歸舟。一半兒蓮蓬。一半兒藕。又西湖

三潭新月浸魚天。十里長堤飛柳絲。尋到水仙王廟邊。裏湖船。一半兒剛來。一半兒轉。又浙江

鯉魚風起鳳山根。白鷺潮來鰲子門。黃雀雨晴魚浦村。亂帆分。一半兒天斜。一半兒穩。又釣臺

渚蘋山木古祠秋。漁子罾師橫小舟。爭道客星天上留。契相投。一半兒君臣。一半兒友。又長山瀧

鷓鴣灘冷渚風清。謝豹花繁春雨晴。烏桕樹翻秋葉鳴。挽船行。一半兒山腰。一半兒嶺。又九峯

一峯低映一峰高。十里沙連十里橋。曾記小船迎晚潮。冷蕭蕭。一半兒蘆花。一半兒草。又虎丘

生公臺上鬪茶巾。短簿祠前羅酒樽。真娘墓傍凝舞塵。款游人。一半兒櫻桃。一半兒筍。

又錫山

錫山泉近筍輿稀。竹火鑪輕松葉肥。蘭草岸回花舫齊。恣攜歸。一半兒香醪。一半兒水。

又金山

城頭殘角戍樓開。天際征鴻丁字排。攜手試登上臺。暮潮來。一半兒江聲。一半兒海。

又淮浦

行來沙際柳陰疎。望裏村邊酒幔孤。聽得渡頭人語無。遠模糊。一半兒吳音。一半兒楚。

小桃紅題王元章墨梅

斜飛蝴蝶撲枝圓。不怕游絲罥。疎影依然水清淺。嫩寒天。墨痕澹處珊瑚軟。似曾相見。稽山風霰。一樹小
牕前。

又送德尹還里

揚州樺子小於龕。粉額朱紅檻。一路垂楊繫船纜。水拖藍。初鴻幾點秋容澹。梅花酒酣。蘆花風慘。夢穩到
江南。

又前題

謝家兄弟舊田廬。好續春池句。兒女團圓紙牕戶。儘歡娛。閒尋掉海塘邊去。村醪遠沽。罾船橫渡。山似小葫蘆。

叨叨令

一年一夢空愁思。六張五角難成事。千呼萬喚無由至。姑負了。燒春酒。美文君市。悶殺人也麼哥。笑殺人也麼哥。相見了。只勝常。兩個消魂字。

又

烏巾斂了煩遮護。縞衣借了親分付。畫船橫了愁行路。有一日。踏花鹿。女花間步。行不得也麼哥。留不住也麼哥。算後會。他生未卜。今生誤。

黃鶯兒

碧玉小人家。兩眉彎。雙鬢丫。春風愛立疎簾下。佳期最佳。陽差不差。心知消息今年嫁。翦秋紗。紗帶合畫。畫取並頭花。

皇清勅授徵仕郎日講官起居注翰林院檢討竹垞朱公墓誌銘

經筵講官文淵閣大學士兼吏部尙書加三級澤州陳廷敬撰

康熙初北平孫公北海老而家居以經學詔後進予亦往遊焉孫公盛稱秀水朱君錫鬯之賢一時東南文學士游京師者共推謂爲老師宿學予心嚮往焉而莫之能識也後舉博學鴻詞授官翰林已而長直內廷予朝夕與君相聚甚驩也甫及一年以謫去予亦以他事引嫌求罷仍留書局兩人者時復得以閒居相過從爲文字之娛游觀之樂數年至今過槐市虎坊之間未嘗不黯黯以悲也君旣南歸後又數年予扈從河上至吳門得見君子于南園至武林又見君子于湖上文采風流不殊曩昔而予則頽然且老矣又三年君歿君外孫周子象益以君狀來偕查子悔餘謁銘于予云非夫子孰可志其墓者予弗敢辭雖然予旣不能爲信今傳後之文亦姑識其平生出處交游之節槩凡吾意之所不能盡者世之君子庶幾有得吾兩入之心于語言文字之外則君有銘而予亦可以無憾矣君諱彝尊錫鬯其字號竹垞先世居吳中自吳江遷秀水高祖諱儒以醫顯官至奉政大夫太醫院院使以子貴贈光祿大夫柱國少保武英殿大學士曾祖諱國祚以醫院籍由順天府學中萬曆壬午鄉試癸未進士第一人除翰林院修撰歷官吏部右侍郎引疾歸光宗初起南京禮部尙書入東閣加太子太保進文淵閣尋以戶部尙書兼武英殿大學士加少傅歸卒贈太傅諡文恪文恪公六子長諱大競仕至雲南楚雄府知府子五人長茂暉以廕授

中書科中書舍人好學問樂取友爲復社宗盟輯禹貢補注君嗣父也本生父諱茂曙楚雄公第二子也天啓初補秀水學生甲申後棄去卒私謚安度先生撰兩京求舊錄有春草堂遺稿安度先生子三人君其長也舍人無子以序立君爲後君少而聰慧絕人生數歲嘗見諸神物異怪狀不類人世及他人視之輒無所見書過眼覆誦不遺一字塾師舉王瓜使屬對君應聲曰后稷師怒笞之爲舉業文千言立就已能工詩崇禎十三年浙東西大旱饑人相食自文恪公以宰輔歸里家無儲粟楚雄公清廉安度先生貧至絕食君守書冊自若也旣而曰河北盜賊中朝黨朋亂旣成矣何以時文爲不如舍之學古乃肆力于周官禮春秋左氏傳楚辭文選丹元子步天歌人皆笑以爲狂迂未幾亂果作君年十七贅婚嘉興練浦之陽馮村馮公有客王鹿柴華亭名士也見君大奇之曰此必以詩名世後君名益高四方以幣聘者爭集其門所至皆以師賓之禮遇焉客游南北必橐載十三經二十一史以自隨已而遊京師訪孫公子退谷公過君寓見插架書謂人曰吾見客長安者務攀援馳逐車塵蓬勃間不廢著述者惟秀水朱十一人而已君旣以博學徵試之殿廷相國馮公得其文歎曰奇才召以檢討充起居注日講官在內直間語予曰公直似益都清如曲沃予謝不敢當以君之賢至今思其言因以自策勵其亦不得不謂之知言也歟君雖以被劾鐫一級罷尋復原官歸里後數年駕巡河上至江浙賜御書四字曰研經博物禮遇之隆固無替于昔時也君旣退而著書有日下舊聞四十二卷經義考三百卷明詩綜一百卷瀛洲道古錄□十

卷五代史注□□卷禾錄□□卷齏志□□卷齏志者通政使曹公寅與君合撰者也曹公爲君刊曝書亭集八十卷未卒業而君歿君之自立如此回視京華儕輩奔走塵埃中所辛勤而僅有者猶泰華之于丘垤衰遲蹇鈍之人俛俛然莫適從也得失之林亦可考而知已君閒居謂其孫稻孫曰凡學詩文須根本經史方能深入古人窈奧未有空疎淺陋勦襲陳言而可以稱作者記云時過然後學則勤苦而難成獨學而無友則孤陋而寡聞予舉此以爲教子弟之法焉君在翰林預修一統志主考江南覃恩授徵仕郎賙贈生父家居十有九年康熙四十八年十月卒年八十一配馮孺人歸安儒學教諭馮君鎮鼎女前十六年卒子一人昆田國子監生賢而有文前卒女二人一適吳江周能察一適桐鄉貢生錢琰孫二人桂孫國子監生稻孫府學生曾孫男二人振祖賜書孫女二人銘曰

或史而野或經而葩物亦有然爲蓬爲麻嗚呼竹垞天邪人邪得于天者旣碩孔多人其謂何

